





MESARAN

PRABODH M. SANGMA



DO·DE MESARAM



PRABODH M. SANGMA

Published by

**Smt. Marvina R. Marak
Hawakhana Deficit Secondary School
P.O. Araimile,
West Garo Hills,
Meghalaya.**

**Chapa Ka'atani Bilsa 12/2002
Copy 1000**

© Copy Right.

Rs. 60/-

***Printed at
Ama Printing Press
Najing Bazar, Tura.
Phone : 22486, 32545.***

DEDICATED
TO
MY PARENTS

AGANCHENGANI

Songsaro ong'enggipa obostaranko sea-jotachi parakna jotton ka'giparangkon novel, drama theatre, articles (nikrangra) aro short stories minga. Iano 'short stories' ko "DO'DE MESARAM" ine ra'gataha. Short story-ni gimin anga angni Assamese ripeng sak'ao sing'oa ua angna indake aganaha. Short Story-ni gimin ua "BINDUTE SINDHU DEKHAR NICHINA" ine aganaha. Uni orto-ara 'Bindu' = Tingtotsa aro 'Sindhu' = Dal'gipa chibima ba sagal ong'a.

Iako A'chik ku'sikchi pe'ode "Tingtotsa chio Sagal-ko nikna man'a gita ong'a." Chongmotan, ku'sik ba katta kan'dikachian pifak obostaranko parakna nangani gimin anga (ku'sik ba katta + kan'dik) "KU'ANDIK" rangko ia ki'tapo DO'DE MESARAM ine mingaha.

Poraisogiparang ~~nannikgenma~~ nanniksojawa ua pilakan na'simangon panchaka. Ia ki'tapo janapgipa pilak obostarang chanchie banaigiparangsang ong'aia. Saobani obosta aro bimingrang ia ki'tapo mescka gita meliangode uarang ong'akanisan ong'aigen.

Na'simangni jeani (criticism) aro ku'pattianiko niksoode namen kusi ong'begen.

(PRABODH M. SANGMA)

*Food Corporation of India,
P.O. Araimile, Tura,
West Garo Hills, Meghalaya.
Pin - 794101.*

Phone Residence : 32259

Agansoani

Je jatni literatureoba rokom rokom bimangrango seanirang gnang. Ia bang'a rokom seanirangni gisepo Golpo seanirangba (Fiction) rokomsa nambegipa seani ong'a, Ia rokom seanirang a'songni, jatni, jo'jolni ong'anggin, ong'enggipa obostaranko janerao gita chacha jrojrang mesoka. Indakgipa kandikgipa Golporango a'song-Chigani bewalrang, jatni dakbewalrang chanchiani aro bebera'ani bewalrangkoba ma'sina man'a. Mandena rokom rokoma ui'anirangko ra'baan baksa jatni seani bewal, katta bang'anirang aro Agan me apa aro katta Jikserangkota ui'na man'a. Uni gimin Golporangko banae seon ua nanggipa seani ong'ode uan nanggipa literatureko jatna on'ani ong'a.

A'chikkuchi Golpo seanirang donggenchimoba uarang rokomgnisan mongsongbate ong'kuen'a. Uarang-Englishrangni Englishchi seako pe'anirang aro Bengali golporangko pe'skanirang, aro rokom gipinara, Achik pazitchamrangni golporangko chimonge chapa ka'atani. Uni gimin da odipet, an'tang banaetingtinge golpo seanirang A'chikkuchi brae dongkuja ine aganna man'gen.

Mr. Prabodh M. Sangma "DO'DE MESARAM" bimingko done Golpo ming 13 ko seaha. Ia golporang antangni taningchi chanchitingtinge banae segipa golporang ong'a ine nikgen. Golpoo janap'ipa manderang, bewalrang, obostarang aro biapran' pilakan iako segipani creation ba banaegipa ong'a. Ian neng'begipa seani bewal ong'oba Prabodh gisik nangtingtinge iarangko duk chakbee see donaha. Ua Education lineo kam ka'gipa mande ong'jaoba aro uni kam uchi ichi uko transfer ka'jojooba

ua dontonggija iana gisik nangtingtinge jeo dongoba sea-
niko dontongjaha aro uni bite da'o nakatengaha. Ia gol-
porang nambegipa, da'ororo seani bewalrang gita aro
chugipa gadango segiparang ong'a. Uandake ia bewal sea-
nian A'chikkuchi seanirangko ja'ku gipinona ra'anga gita
ong'a. Anga bebera'a je iako badiaba Organisationrangni
dakchakachi kitapni biman'ona ra'bana man'genchim
ong'ode A'chik chadamberangna namen dakchakbeani
ong'gen aro uamangkoba didiatani gitaba ong'gen.

*Dated Tura,
the 5th March, 2002.*

*Dr. Milton S. Sangma
Rtd. Pro-Vice Chancellor.
NEHU.*

DO·DE MESARAM

PRABODH M. SANGMA

Mikkangchi Chapa Ka'atnagiŋa Ki'taprang

1. Ka'tongni.Chokchimsa Pul (Poedo)
2. Ka'sara Salmc (Watatkugija Salmena Chitti,- Novel)
3. Ku'cholsanni Bite (Novel)
4. Ku'rambal (Novel)
5. Nanggorere Goserong (Novel)

1. Dakbewal aro A'chik Matgrik.	1
2. Atchu Budeꞑani Salrang.	10
3. Parakgija Duk.	16
4. Seng'watni Teng'a.	24
5. Do'de Mesaram.	32
6. Pygmalion aro Galasia (Galatea).	39
7. Boksis.	50
8. Ka'saa Atchiramasachiba.	56
9. Rasong kopal.	62
10. Bon'chotataha.	67
11. Mirim Rongprakni Gamchata.	72
12. Ka'a, Chia, Sipaka.	81
13. Jama janggina Mangonani.	95

DAKBEWAL ARO A'CHIK MATGRIK

Songadamode skulni skigiparangko namen mande aro bebera'a. Skigipa jeko azana ukon darangan manitoka aro skigiparangde (Masterrang) a'gilsakni giminba pilakkon ma'sitoka ine chanchie ra'a. Sin'karini attam-sao bandasalo wal'tim so'e wa'al chakmitingo songni manderang rokomari kattarangko skigipao sing'ronga. Wal'tim chake donggiparangni gisepo saksa A'chikni Dakbewal aro A'gilsakni Skanggipa Dal'gipa dakgrikani gimin sing'oa skigipa indine aganna a'bachengaha.

Siani nalsachiba chibima batna nanga ine A'chik-rangde bebera'a aro ua sigimin mandeni janggi silchi jedakode kewapara on'ne chibimako batna maming dikdar man'janagita dake ua sigimin mandeni jakoba paisarangko jakkipatronga. Mitamrangde rang, ba'ra, sona, rupa aro ma'manti bosturangkoba sigimin mandena on'atcha'kuenga. Jakkipatgimin tangka paisa-chiba ua siani nalsao donggipa janggi chiripramni chibimako batangna man'jaode, matchuni ki'meko rim'emangba ua chibimako batangchina ine A'chikrangde matchukoba sigimin mandena dokatronga aro ua matchuni be'enko song'e rite jinma Mahari ma'drang nangrime ua sigimin mandeni jangginaba chinronga aro ja'man an'tangtangka cha'ronga. Sigimin mandeni janggi baksa matchuni janggiba ua sigimin mandeni janggiko siani nalsao donggipa chibimako batna dakchakangpachina inesa matchu dokatronga. Sigimin mandeni janggina matchu, wak doke alanikon 'ME'MANG KAM' ine minga. Uni ja'mansa

sigimin manderangni janggi silchi me'mang a'songona ba BALPAKRAM - ona re'angrongana, re'angna man'ana ine A'chikrang bebera'a. Me'mang kam ba Mangcna, Delang, Krita, Amua, Ajea, Torea, Sima nia, Do'sia, Dodokkia, Wangala aro dingtang dingtang d'akaniran'an A'chikrangni 'DAKBEWAL' ong'a. Ia dakbewalrangko gale ba guale an'ching maming saloba an'tangko A'chik ine parakna man'ja. Dakbewal'an jatni mukut aro jatangko parakani chol on'chon'mota. Dakbewalchisa sawa mai jatni ukoba ma'sina man'a. Indiba da'ororoni A'chikrangde, chengo ambi atchuni dakdilba'agita sacba sigimin mandena delang rikode, krit-amuode ba do'dok do'siahaode, che | iarangde Songsarekrangni kamsa iie mikchep-chonnike inronga. Songsarekrangba A'chikan ong'a, ukode gualaia, kakketko aganode, Songsarekrangsa da'oba A'chikrangni dakbewalrangko manikuen'a aro ripingkuenga. Kritgipa amugiparangko aro do'dok do'sigiparangko iamangde Songsareksa inenba an'tangkode mai ine chanchipila ukosa agannan man'ja.

Dakbewalchisa jatko parakna ama indiba torom-chide jatko parakna man'ja. Toromde siani ja'man janggi silchina nama namja ramako indake dakode janggi jokgen ine mesokanisan ong'a. Siani ja'man mandeni janggi silchi bachimancha re'angchong'mota uko sakkignang darangba mesokna man'ja. Dakbewalming Toromde namen dingtanggrika. Toromo pangchake jatangni dakbewalko 'Songsarekrangnisa' ine an'tangoniko chel'ate ra'-na nangja. Jatni Dakbewalko maniani gimin torom nosto ong'jawa aro toromko janggi jokna maniani giminba dakbewaltangko mitchina aro chonnikmikchepe ra'na

nanja. Dakbewalan torom aro toroman dal.bewal ong'a ineba ma'sisretna nangja.

Janggi jokna bebera'ani bidingo je toromkoba ra'na man'a uade paltangtangni katta (individual matter), ind'ta jatko parakani bidingode, je dakbewalchiba ong'ai-gen ine chanchitokode jatangni dakbewalko namen ong'-siatani ong'gen. A'chikrangni gisepon Hindu, Christan, Muslim ba dingtang dingtang toromrangko ra'giparang don'naba don'a aro torom dintangoba uamanokoba A'chikan mingkuzen. Indiba, A'chik ong'eba jat'an'ni dakbewalko guale ba gale dingtang ba sakgi-inni dakbewalan'ko dakangode, ja'rikengode uko A'chiknian inna krajajok. Uni gimin toromtangko an'tang ka'tong ning'o donne, an'ching pilakan ku'cholsan ong'e jatni dakbewalko ripin'angna aro a'gilsak mimikna jatko niksen'atna krengtokna hai, ine son'ni skulo ski'ipa (master) wal'timo wa'al chake donggipa pilaknan a'an-paiak-ataha. Uno knatimtokgipa pilak man'le.an'an jakpa doktokaha aro dakbewalko ripingna nangchongmota ine grai dake pilakan namniktcke ra'chaktokaha.

Unon masterni kattarangko knatime donggiparangni gisepo saksa budepa, songsulo knal 'Atchu Chenggan Sagini' me'mang kamko dakengana aro ua kamo an'ching songni manderangkoba re'angpa'china aganangenga ine jinmana aganaha. Mitamrangde 'angade me'mang kam dakakoba nikkujaenga' ine ua me'mang kam dakaona re'angna ku'mongtokaha.

Salgipino "Atchu Chenggan Sagini" me'mang kamna alaniko cha'na, mitamrangde me'mang kam maidake daka uko nikkuja manchae sokbatokgipa manderang

bang'baaha. Okama man'gijigipa manderangba sokbaiaha. Matchu, wak, do'bok, do'oranko bang'en dokaha. Churiggiparange ringengjok, song'gipa ritgiparang song'engiook ritengiook aro Man'onani dama bangsiko grai grai dake dalrigipade dam'enjok. Mitamrange mi cha'tokenjok. Mi cha'enggiparangni gisepo sakgni mandede a'bachengoni cha'na asongeba, badita chanrang gipirange cha'e chakattokan'engaha, indiba uamang sakgnide chaan chakatkujang'a. Changantian bijak sualgiparangko, ei, iachi wak be'en on'tisa, matchu be'en on'tisa donangku inarian cha'e chakat'ja dongaiaha. Nikgipa sakantian uamangni cha'na nalana aiao innanaha. Uamang sak'nini mikkang on'tisaba kratcha'ita dakjachim. Nidike aro ka'onange bijak sualtimgipa saksa uamang sakgniko indine inaha, "nasongara chason'oba cha'man'gijigipa manderangma? A'bachengoni cha'na asongeba da'oba okkakujaengama? Aiao! indaka kalbongrangko angade chason'oba nikkuja". Unon ua mande sakgnioni saksa indine inchakaha "cha'na on'na man'jaode maina me'mang kamko dakjok, maina manderangko okanjok". Knarian ka'onanga amchakjae ua bijak sualtimgipa "kratbachaja'ma sala achak" ine re'ange satkapeaha. Ua mande sakgniba chakateming dakgriksrangaiaha aro indaken uano namen gondogol ong'aha. Sakgnini giseponiko saksakon uno donggipa manderang amtokjaha. Ua mande sakgnini bimingko Bendang aro Goman mingachim. Uamang jegita cha'na nala uagitan bilba bilakachim. Bendang bingbing bangbang jebaisi satbingbangna a'bachengaha. Bang'batan bilding bildang dake uanoni kene katokaha. Saksa uanona sokbagiparangoni sriksrik re'ange

Police-na report ka'eaha. Police-rang re'bae Bendangko aro Gemanko rim'angha. Unomitingo Bendangni jikgipani 'ako jasani bi'sa saksa dongachim.

Ua somoichachaon Europe a'songrango namen golmal gondogolrang ong'engachim. Arch Duke Francis Ferdinand, iean Austria aro Hungary-ni Raja ong'gnigipachim, Bosnia a'songko nirokna ine ua jikgipako rime Bosnia a'songona re'angaha. Unon salmajrangjrangon, Bosnia a'songni skotong Sarajevo songjinmani rama jatchio uamang jiksesako ka'saninggija dake 1914 bilsini June jani 28 tariko so'ote galaha. Bosnia unomitingo Austriani ning'ochim. Austria namen ka'onangbee 1914 bilsini July jani 28 tariko rang'san chadraper Serfrang (Bosniani manderang) baksa dakgrik-dinggrikna a'bachengaha. Arch Duke Francis Ferdinandko aro uni jikgipako indake ka'saninggija dake so'ote galana bang'bata a'songrangan namnikjaha aro Serfrangko mitchiaha. Indake a'gilsak gimikni a'songrangan jingjengna a'bachengaha. Austriana aro Bosniana chakgiparang dingtang dingtang dolko bikotaha. A'song ge'sa a'song ge'gipinko bebera'na man'grikjaha. Bil susagrikani, mikbugrikani a'gilsak gimikni a'songrangan ong'na a'bachengaha. A'gilsakni a'songrang dolgini dake susagrikna a'bachengaha. England, France, Russia aro Japan dolsa ong'aha aro Germany, Austria, Hungary, Turkey aro Italy dolgipin ong'aha. Indake, skangzipa A'gilsakni Dal'gipa Dakgrikani chongmotan- "THE FIRST WORLD WAR" a'bachengaha. Englandba 1914 August jani 4 tarikoni ia Dal'gipa dakgrikanio bak ra'pana draatako man'aha. Unomitingo a'songba Englandni ning'osachim. Ua dakrikao sipairangko nangani gimin Indiaonikoba rimangaha. Man-

de bilakani gimin aro ka'donggipa ong'ani imin Bendang aro Gomankoba France a'songona Germany-rang baksa dakgrikatna jasamangmang 'trainin?' o'ne rimangaiaha. Pattoko chipe dona salchibongasan ong'aipitichim Bendang aro Gomanko. Kusi ong'e Bendang aro Goman France a'songni MARNE minggipa chibimani rikamo Germanrangming pilak pil'tak dakgrikaha. A'chikran'ni nawang dake dakrikarangko nike a'gilsakni mandealaba alao inmanaha. A'chik songoni matrikran' France a'son'ni VERDUN minggipa biaroba ka'dongbee dak'rike bobilrangko amchichote donbaaha. Baditaba A'chikrang France a'songon siaba sibaaha. Achik matgrikran'oba A'gilsakni Skanggipa Dakgrikanio an'chi on'raha. Mitam A'chik matgrikrang dakgrikao sibaoba, uamangni biming aro rasong a'gilsak bon'ja dipet A'chikrangni ka'tongo sim-ilgipa bibal ong'e jrin'jrotna bale dongkam'en aro a'gilsakni itihasaoba pangnan uamangni biming sal'gini askiranggita ching'e donggen.

Bils 1914-oni a'bachenge bils 1918 bilsiosa ia A'gilsakni Dal'gipa Dakgrikani matchotaha. A'gilsako bang'en mande sibeaha. Saoba saobarangde an'tangtangni pako, depanteko, mama-adako aro ka'sa-mikchatangrangko ia ong'sigipa an'chi pari nikatgipa dakgrikao gimaataha. Tangedongenggipa sipairangko dakrika matchotani ja'man an'tang songtang noktangtangchina watatpilaha. Gomande Germanrangming dakgrikmitingon siaha. Bendangni sambao donge bobilrangming dakgrikmitingon Gomankode guli re'bae chello nangeaha. Gomanni be'en gimik an'chirara dake gitilgopako nike Bendang duk ong'bee "Goman na'a angko wate re'angnabe" ine ripengtangna grapaha. Bendangni una grapako nike Goman Bendangko manenge in-

dine inaha "na'a dakgrikani bakrao re'bae grapenggipa mai dakgipa sipai, na'a ka'ponoma? Na'a angni gimin duk ong'nabe aro angna chanba chanchinabe, na'a an'tangna simsake dakgrikangbo, dakgrikao amna jotton ka'angbo aro an'chingni gipin a'songo dakgrike amaniko an'chingni A'chik ma'gipa pagipana aro chadamberangna aganebo, rarakebo" ine Goman Bendangni jakko rim'tate janggi galangaha.

Bendang dakgrikao ka'donge bimchipe dakorikani gimin ua bang'a boksisi aro medalrangko man'baaha, indiba ua uni namnikbatgipa ripengko jrin'jirotna gima-at'aaha. Bombay-oni Calcutta-ona, Calcutta-oni Guwahati-ona aro Guwahati-oni Tura-ona ua sokbaaha. Tura-oni ua songtangchi bus-o gae re'angaha. Ramao bus nosto ong'change songtango sokna aditade walaiaha. Jabitchimchim Songoni bus station-ona Bendangni nokona kilometre gittamangde chel'en. Daldam chibimani chisamonchim. Degipana ua France-oniko ge'sa dal'a kal'ani dalibibiko, jikgipa aro ma'gipana ba'ra paiprak ra'baachim. Demechikgipako ua jasa ong'akosan donangachim. Haida da'ode dal'engonok, ama baba innaba man'enggnok. Uko uni bi'sa ma'sisoama ma'sisojawasai inerang ranajoljol chanchibaengachim. Indake rikkit dangkit chanchibae ua an'tangni kitanggipa pokkri sambao soka-kon uijaha. Pokkri rikamo dongsoen demechikgipa "baba angna maiko ra'baa" ine sing'soaha. "Iakosan ra'baiane amane" ine ua dalibibiko bi'sani jako on'nataha. Adita waltingahaoba demechikgipa pokkri rikamo saksan dongsoani gimin Bendang gisikode on'tisa jajrenga gita dakaha. Demechikgipako ua gipake ku'dimnade sikjokchim, indiba, chel'a ro'aoni re'baode ja'su miksuchenggija, on'tisamang

neng'takgila be'enni kramchirangko ran'atgija, bi'sa-
 ci'sako gipakmalia tangtar'malia ine chanchie ua bi' a-
 kode dangtarjaha. Ua an'tang nok a'tilaona sokaha. Ma-
 girade a'tilaon andal min'dik murao asonge dongsoen'a-
 chim. Bendangni pagirade uni bi'samitingon siahachim.
 J'kirade babilisio ma'bako dakenza, uaba andalmin'dik.
 Bendangba nokn'ingchi narchenggija a'tilaon jolongga-
 ran'ko done ma'gipani sambao asongaha. "Ma'iana
 chakkirangko so'ja" ine Bendang sing'alia. "Maina
 chakki nanga, chakki grian namaja, chingnade chakki-
 rang mamingkon nang'jajok" ine ma'gipa Ben-
 dangna agachakaha. "Nonoma na'ara mai dakenza"
 ine Bendang jikgipako sing'ataha." Cha ritengaj ine iik-
 gipa aganchakataha. Bilis bongarangni ja'man nokona re-
 baoba jikgipa uko rim'chaksona gita changsaba nokonin
 ong'katbajana mikkangkon pa'ejana Bendangde gisiko
 ma'barangko dingtang dake chanchina a'bachengaha.
 A'tilaon asongarian babilisini chankolkode nikataiachim,
 indiba chankolo wa'al ching'akon nikatjaha. Bendang ma-
 mingkon ma'sina man'jaengaha. Chakkikoba so'ja, chan-
 koloba wa'al ching'ja, mai dake cha ritengjok, ua ding-
 tang dake chanchina a'bachengaha. Una agreba nibo, uni
 demechikgipaba sambao dongjaha. Bikipil bawil chanchimi-
 tingo, jikgipa una cha ra'baaha. Jikgipani jakoniko chako
 ra'chakna am'mitingon, ma'gipa sambao re'bagalgale
 chako rang'san kapgnang dokpakate, "Bendang na'a ia
 chako ringnabeha, chingade sigiminsajok" ine chrike
 ma'gipa unon gimae kataha. Bendang siboke a'tilaon wal-
 gimik ga'ake dongaiaha.

Pringo songsulni manderang re'bae Bendangko
 sibokako nikaaha. Mejalo walon uamang chrikako knae

maibade ong'ahakon ine ma'sima mah'achim; indiba, wal-
tingahani gimin uno re'bae nienade darangan ka'dongjaha
aro pa'jaha. Bendangni ma'gipa, jikgipa aro degipa
MARIKI (cholera) sabisiko man'e re'anggipa bilaton si-
tokahachim. Umangni songoni bung'batan nokgibale
gimik sitokaha aro jerangan tangkaengachin uamangni
songko wate gipin songgitalon katangtokaha. Bendang
danang ia an'tiomangmang France-oni re'bae mamangkon
ma'sijaha.

A'gilsakni Skanggipa Dal'gipa Dakgrikachi re'ange
Bendang jikgipa, degipa, ma'gipako songtangona re'bae
nikejaha. France-oba ua uni namnikbatgipa ripeng Goman-
ko aro gipin ripengrangko gimaatbaaha. Ia gimikko gim-
aatbaoba Bendang dakgrikaode chebaaha.

Songsulni manderang Bendangko hospitalona ra-
ange doneaha.

ATCHU BUDEPANI SALRANG

Saksa budepa jako gol'dik ra'e, rama gita re'ang-enggipa sakanti manderangko nirike maikon am'engachim darangba ma'sina man'ja. Haida ua bilsu sotchet-rangde ong'gnokkon. Uni nianirangko nirike niode indake chanchiman'a haida ia budepa uni gisikni janggilo botomenggipa bang'a gisik ra'anirangni giseponiko malkoba bikote am'enga ba sandiengakon. Uni janggi tanganio gisik ra'anirang bang'beoba da'ode uarang gualani okningosa chaprang kae dongengjok. Changsao uni jik-de, tangka-palsa, matchu-mate, chakkol-nokkol, nokjam, gamjin pilakan dongachim. Indiba da'al ia ka'san-inggijagipa sal somoi uni kosako keleng mikronchi niani giminsa uni obosta indake ong'na nangaha. Da'ode uni mamingan dongjajok aro uko darangba u'ijajok. Gisep gisep ua jeponiko bikote maibako nironga. Haida uni demechik depanteni ba saoba mande u'igipani photorang ong'naba dongakon. Ua photo-o donggipa manderangkon haida ua gisikode am'enga. Uni giminsa ua sakanti manderangni mikkangko name name nironga u'igenkon ine chanchie. Basako basakobade ua mande nokrangchiba re'ange manderangko nironga. Saoba saobarangde gilamgipakon ine chanchie merong ba tangka paisarangko on'atna am'oba ua ra'gijaan katbaia. saobarang cha'aniko on'ode ukode cha'baia. An'tangni nokjam banomanchachim ukon ua name gisik ra'na man'jaha. Daode ua mikron manchaba nikmanjaengaha. Maming bosturangkon ua rongtale nikna man'jaengaha. Uni janggi tanganio bebera'na man'gijagipa a'sel ong'changaha.

Ua a'selni giminan ua gimikko gimaatna nangaha. Indiba uni kattarang kakket ong'oba dao sawa uko beberagen, ua uni kosako ong'chonmotgipa dukrangko sana agangen, sawa knachakgen. Uni chasongni manderang haida pilakan sitokaha. Saoba tangengkuoba haida u'git-an budepa ong'aha aro mikronba nikjaengaha. Indake ua uni chasongni kattarangko aro da'o ong'eng'gipa obostaran'ni gimin chanchijoljole sorokgita re'bamitingo ki'san'echipak Maruti garini 'horn' on'akoba knajaha. Knagake rang'san an'pile katna dakon Maruti gario chagakeaha aro chagakani ja'man tang'bingbange ua budepa rama sambani ro'ongo ga'akeaha. Uni sko ro'ongo suttingea'ita dakani gimin aro chelba ro'ong ko'sako ga'akeani gimin ua namen jokom ong'aha. Sko bretenba mik-kang gimik, be'en gimik an'chirara ong'aha. Dosde ua atchu budepanin ong'achim. Je ong'oba, ua Maruti gario chalaigipa pantean budepako hospital-ona ra'angaha aro ia budepako name sanatbone ai, inaha. Hospitalo dongsogipa Doctoran ia Maruti chalaibagipa pan'eni ma'gipachim. Ia panteara ia bilsu mangmangsa Pune-oni Civil Engineeringko pass ka'bagipa ong'achim. Doctor depantechipakko niate, 'mai dake chalaiba'esa indake 'accident' ong'atjok ? Nang'ko anga pangnian simsake chalaichina aganatrongachim, maina manija'? ine mang-angaha. Indiba ua Maruti gario budepako de'tome ra'ba-pagipa mande sakgni 'sahepnide dos dongja Doctor; ia itchunin on'tisa gualani ong'a maina chingaan ua biapo chadenge nie. dongtokengachim' ine ua pantena chake aganaha.

Hospitalni Nurse-rangko okamatgalgate Doctor, ia budepani mik'kangni an'chirangko su'srangataha aro

matgiparango sam tapate bandage kae donaha.

Salgipino Doctor re'bae ua bubepako. 'check up' ka'aha aro ua ka'tongo ba chelo sakna bilongka'aha ine ma'sina man'aha. Ia budepani chatchi bakdil aro jikgipa degiparango Doctor am'na a'bachengaha. Degipaan ia budepako 'accident' ong'atani gimin Doctorde gisiko budepako sina kene an'tangan samrangko ra'e sanna a'bachengaha. Ia budepako darangba sandibagipa dong-jachim. Uni chatchi bakdil aro jikgipa degiparangni gimin sing'naba, budepara ka'tong saani gimin kattakon azanna man'jaengachim. Doctoran ia budepana cha'na ringna, samna bolna pilaknan koros ka'engaha. Ia budepako Doctor namatgalgalna sika, maina, ia budepa sijokode uni mahariran? ong'jaoba uni jikgipa degiparang 'case' ka'naba donga. Siana 'case' ka'jokode depantegipaan ga'akgen.

An'tisani ja'man budepa on'ti on'ti katta aganna a'bachengaha. Doctor uina skenba ia budepani chatchi angbak, uni jikgipa aro demechik depanterang dongama dongja ine budepa sing'aha. Unon ua budepa, 'dongachim indiba uamang da'o bano maidakenza angade u'jajok, haida, angkoba uamang ur'jawajok, angade p'akkon gualaha Doctor' ine ua budepa aganchakaha. Nang'ni gisik ra'adijet aganbosong' ine Doctor mo'mola gnang budepako inaha. 'Batangginna sarangni g'itaham kattarangko knae, mai lab ong'gen Doctor, angade ua kattarangko darangan agana sikjaha' ine budepa duk ong'agita dake jipa dongaishu. 'Aganbo, haida anga nangni jikgipako ong'jaoba, nang'ni demechik depanterangkode u'itaba donga' ine Doctor aganaha. Unon ua budepa, 'indida knabo. Indiba angade bang'a kattarangkon angahana Doctor'

ine budepa uni janggi tangbao mai ong'chongmotachim uko a'anna a'bachengha.

"Angniba tik nang'gitan daka demechik saks dongachim. Ua demechikna anga namen kasabeachim. Angni bi'sarang sakbonga dongachim. Me'chik bi'saan chonbatgipachim aro sakba saksasanchim. Ua taning gnanggipa demechikchim. Uko anga Doctor poraiatna sikachim. Indaken anga angni demechikko Delhi Medical Institute-ona rimange admit ka'e donbaachim. Bils bongani ja'man final porika semitingon angni demechik uni nokchi re'baengani tarikko aro badia rel gario re.baenga uaranko janape angna ohitti seatachim. Anga chittiko man'soe angni demechikko nichaksona gita uni chittio seata tarik gitan Guwahati rel station-o senge dongsoengachim. Angni demechikni seatgipa 'NEW DELHI NORTH-EAST EXPRESS' rel gari no. 5621, Guwahati station-o pring sni bajio pokena. Rel garini kuturi ge'prakoniko angni demechikko sandi-mitingon angni rasong kopalni salgisako dal'bea, aram simdapaha. Ua rel garini kuturi ge'sao gabagipa Police-rang angko okamataba aro ua kuturichi napangon angko ong'katbana on'jaha. Ua rel Dibrugah-ona re'angenchim. Angko drae uno asongataha. Angni Policetang ming angade angni demechikko nichaksongaa re'baa, me jegrikmitingon rel gari watangajaha. Anga ong'katbana naman man'jaha aro uamang angko ong'katbana on'jaha.

Asol katta chong'motte indakesachim, ine budepa asanangkaha. Police-rang sak chibonga papuranko Bongaisan-oni 'Tezpur Mental' hospital-ona re'angenchim. Badiba station-o Police-rangni on' angnitingo

saksa paglade gimaaha ba bachiba kataha. Pagla saksako gimatani gimin uamang an'tangtangni kam bon'a kenaha. Indakesa ua gimagipa paglani bodol 'Tezpur Mental Hospitalode' angkosa mesokskaaha. Mai dakgen Doctor anga indake rasong grigipa mande ong'na nangaha da'al. Ua 1962 bilsichim. Ua bilsion Chineserang Indiako bobil dingengachim. Angko Tezpur Mental Hospitalona rimanganisalon Indlani Prime Minister, Pa Jawaharlal Nehru, Tezpur mental hospitalko 'visit' ka'achim. Unon saksa pagla, Pa Nehru-ni jako rime 'na'a sawa? iano maina re'baa' ine sing'aha. 'Anga Indiani Prime Minister, anga na'simangko nirokna ianona re'bara' ine Pa Nehru-ni aganon, ua pagla 'angaba ianona re'bana skangde 'Abul Kalam Azad chim, ha| ha| ha| he| he| he| ine ka'dinge re'angaha. Indake anga bilsi38/40 ua abnormal manderang baksa dongpana nangaha. 'Germany-ni 'Psychiatrist' Doctor re'baesa angni an'chirangko porika ka'e nie 'ia mandede pagla ong'nan kraja' ine angko 'release' ka'e donangaha. Angni jako hajalsa tangka on'e aro Police sakgniko angming watatpa'e Guwahati rel stationon angko nokchi re'angbo ine wate donangaiaha. Manderangchi sing'e sing'esa anga re'anggipa an'tio Turaona sokbaaha. Bilsi 38/40 ni jaman Tura-ko anga namen dingtangbee nikaha. Angni nok banonchim, angni jikgipa aro demechik-depanterang da'ona tangkuengama sijokma angade mamingkon ma'sijaha. Haida uamang tangkuengoba angkode ma'sijawajok aro anga tangkuenga ineba uamang bebero'jawajok. Indake angni janggi tanganio rasonggribatsranggipa ong'a Doctor. Haida uamang, angni jikgipa, mosa-boning aro Maharirang angko sandienggenchim. Sandie man'jae angko sijok bon'jok inesa chanchie ra'aha, ine budepa mikrono mikchi jingjang jing-

jang dake grapbeaha aro "bebera'jaode ia angni demechikni Delhio donge angna chitti seatgipako nibo aro ia uni photo" ine gitcham chittiko aro photoko rera rera ong'angpil'aha, uko Doctor-ni jako on'ataha aro angni demechiko 'BEATRICE' mingachim ine agane jrip dongaha'

Doctor-ba ia budepani kahaniko ba janggi tangbaa-niko knatime maibarangkode on'ti on'ti ma'siba'engahachim. Indiba, jensalo demechikgipako 'Beatrice' mingachim aro ua demechikgipani rera rera gitcham chittiko aro photoko nikon, poraion, Doctor-ni ma'sina mamingan bakki dongjaha. Doctor rang'san ka'tong be'e ka'siksike grapbeaha aro 'baba, angan nang'ni demechik, angni bimbingan Beatrice, nang'ko 'accident' ong'atgipa angni depante, nang'ni su'gipa, ia angna poraina on'gipa chittikó angan nang'na Delhi-oni Guwahatio sengsochina seatachim, ia photo-ba angnian baba' ine Doctor hospit alon awak awak grapsrangaha.

Bon'kamao, budepa bini ka'sabegipa demechikni jakon ga'akaha. Doctorni 'baba angan nang'ni demechik, angni bimbingan Beatrice' inako knae budepa namen gisiko kusi ong'aha aro ua kusinian uni janggi silchiko jringjrot-na tusiataha.

PARAKGIJA DUK

Tracy gisiko indake chanchina a'bachengaha, ia nito-gipa a'gilsak, ia janggi, ia songsar, gisikko salopani, milbokani, gisik rinokani, ka'saa, ia pilakan man'en' janggini dikdiksana ba salgnirangni jagringgitanan. Saoba Saobarangni indake aganako ua gisik ra'aha- "am'e man'gijani'dukna bate man'e gimaatani duk bata". Indiba Tracy-de am'gipakon man'aha aro uko gimaba g'maatkuja, indide unimaiani duk? Paipade saksa Government Office-ni dal'gipa officer ong'a aro ma'gipara saksa 'first class contractor.' Tangka paiza chakkol nokkol, maruti garirangan sakprakna bolprak donga. Indide Tracy-ni maini duk? Cha'na ringna jekoba dakna suakpile tangka paiza man'oba mandeni gisiko duknisan ong'alama? A'gilsako ong'chongmotenggiparan? inditan ka'saninggijani, chagronggiparangsana uko ma'sina man'aia. A'gilsakni mai ka'saninggijaniko Tracy man'engachim uko una agre darangba aganna man'jawa. Indiba indinari mikkanngmangmangko niaride Tracyni maming dukan dongja fine chanchiman'a. Maina ua pangnan kusi ong'e aro manderang baksade ka'dingsmite katta aganrongaiaachim. Tracyni bewalrangko noksulrang darangan namniktokachim. Darangan Tracy namen kusi ong'e dongenga inesa chanchiaiaachim.

Tracyni duk be'en bimangni aro okni ong'ja, indiba gisiknisachim. Ua gisikni dukko darangnaba parakjachim. Maina, an'tangni nokni obostarangko gipinrangna parake roode paani ma'ani aro an'tangtangniba kratcha'ani ong'a

ine chanchie ua chakchikaiachim. Una agreba ia kattarangara uamang jikjesanisan ong'a. Jiksesani gisepo uamangni jeba ong'china, uko ma'gipa pagipana ba darangnaba Tracy aganna sikja aro gualeba aganjachim. Noktangni kattarangko gipinrangna aganjoe rogi pa me'chikba namgipade ong'ja. Tracy indiba segipani kattarangko ba uamang jiksesani gisepo am'pak kancha salja biap bi-cham nan'rimgijaniko darangnan on'tisaba ma'siatna on'jachim. Tracyni segipako Donring mingachim.

Donringni B. A. porikako semanon pagipade siahachim. Donringni kosakon nokdangni pilak balboja ga'aka gita ong'ahachim. Nogipa sakgniba poraimitingchim. Nokniba nama obosta ong'jani gimin Donring kam am'e ban'a office-rango dorkasto galaha. Una chona rema ong'oba kam ge'sa nangchongmotengachim. Bang'a interview-rangkoba ua on'aha, indiba chakkorikon man'a amja, maina uni jako gus on'na gita tangka paisan dongjachim. Jentensa ua 'tution' poraiate nokdangko aro nogiparangko poraiatengachim. Uamang namen kosto man'engaha. Donringde sko taning tik ong'piljaengaha. Indita kamna dorkasto galarangni gisepo da'o ge'sasan dongkuenga. "Interview call" kode unikoba man'sojok. Indiba 'interview' on'na re'anggan uni jako paisa pelsaba dongja. Maidake 'interview' on'na re'anggnok Donringde chanchinan changpiljaengaha. Nogipa dal'batgipade adagipani dukko ma'sina man'e antangni nachilni sonani nadeko oke adagipani jako on'e "dada, ia sonani nadeko badiaba dokanrang'o bordoki done na'a uni palsachi 'interview' on'na re'angbo" ine inaha. Nogipani indake antangni sonani nadeko (earring) on'kange adagipana dakchakna sikaniko niki Donringni mikron mikchi srasra dake ga ak-

ba'engachim, indiba ua an'tangni ka'tongko nom'boke mesokna sikjae bik kattako dingtangat "Emily nangia-wa, anga 'tution ra'gipachikon on'tisa 'advance' tangka bi'e niaignok" ine aganaha. Nogipani indake dakchakna gisik dongani gimin Donring namen gisiko kusi ong'aha, indiba an'tangde adagipa ong'e ua nogipani nadeko ra'chake bondoki donnaba kratcha'aha. Maina, da'o nogipani sonani nadeko bon'ate ja'man ra'e on'na man'jaode namen dukni katta ong'gen. Adatangrangsa nogiparangna maiba maiba bosturangko ra'e on'na nangachim. Indiba maiko dakgen, Donring chakkorikon man'kujaenga. Uaba nogiparangna aro ma'gipana maibarangko ra'e on'nani gisikde dongachim. Indiba ua da'onaba maming cholkon man'kujaenga, uni gimin Donringba gisiko namen duk man'a. Ma'gipa aro nogipa sakgnina ba'ra patchaba ra'e on'a dongkuja. Iarangan Donringni gisikni dukni aro kratcha'ani ong'a.

Tution poraiatani paisako gong kolgrik 'advance' ra'chake Donring Town-ona re'angaha. Officer an'tangan Donringko nokona okamatachim. Officer an'tangan uko nokona okamatani gimin Donring ripengskaranonaba chakkori man'chongmotaignok ine ka'donge aganba'achim. Officer-ba uni salo nokon dongsoachim. Do'ga doktiko 'yes', come in' inani gimin Donring nokningchi napange 'Good Morning Sir' ineaha. "Sawa! O, Donring? Re'ba, re'ba ua chokio asongbo. Aganbosong nangni koborrang mairokom? ine officer Donringko sing'soaha." Kam man'gija 'bekar' ong'e donggipani mai kobor namgen sir, B.A. pass ka'ani bilsigitamrang ong'engaha, maming chakkorikon man'ja, na'an u'ia sir. Chingni nok-

dangba cholian cholisrangjaengjok. Ia changode ka'sapae
 chakkori ge'sakode na'a angna dakchakpabo sir. Anja
 chasongoba nang'ni dakchakaniko gualjawa sir " ine
 Donring mol'molaha. Chakkorikode na'an man'a nanga,
 indiba na'a chio jrona changama chan'ja" ine ua officer
 Donrin'ko sing'skaha. Donrin'de officer-ni kattako ma-
 mingkon ma'sina man'jae "maiko inachiu sir, angade ma-
 sinan man'jajok," ine inskaha. "Ma'sijaode ua kattako
 donaibo. Chakkoride bolni bite on'ja. Nang'ko an'tang-
 ni mande ine chanchiesa nang'na ka'sachake anga nok-
 tangona okamatpile aganenga. Na'a ra'chakode ra'chak-
 na man'a, indiba ra'chakna amjaode angni maming dak-
 chakani chol dongja. Da'ona kingking hajal kolgrikrang-
 de on'giparang dongahajok. Na'a uamangna batkale on-
 'darode nang'nian chakkoride ong'chongmotaigen, na'a
 mamingnan chanchina nang'jawajok" ine officer-ni inon
 Donringni ka'dongan' salgisako chatbea aram simdapjola-
 ha. Donrin'ni chakate re'na dakon "re'angaengjok Don-
 ring?" ine officer,sing'skataha. "Oe, re'aignok sir. Ianona
 re'banan anga jentensa tangka zong kolgriikko jugal ka-
 bana man'aha, hajal kolgriikko anga baoniko man'gen?"
 ine Donringba aganchakaha. "Atcha, indide na'a tangka
 on'na nangjawa. Indiba na'a angni mingsa kattako ra'ode,
 angna ku'mikchete ku'rachakode...." inbamitingon officerni
 katta agana bon'kujaengon "mai kattarangna ku'mikchet-
 na nanga sir" ine Donring sing'atskaha. Officer dikdiksa
 chanchia gita donge "Ango tangka paisa, gamjin, chakkol
 nokkol, garirang. aro songni manderangni mande ra'ani-
 koba anga man'nenga, angko darangan namen suk ong'e
 dongenga ine chanchitoka, indiba angni ka'tongo anga
 pangnan duk ong'e donggipa saksa mande ong'a. Angni

saksakamkam demechik Tracyni gimin na'aba ma'sia, ua nokdang ba'ku dakan'na gita da'omangba darang rip-engkon man'kujaen'a. Na'a jodisa angni demechik Tracyko jikgipa dake ra'chakode anga nannen kusi ong'begenchim aro nan'na naba namen nambegenchim. Nang'ni ma'gipa aro nogipa sak'ni donga, ukoba an'a nia. Na'a Tracyko ra'chakode, nang'ni ma'gipa aro nog parangnaba dakchakan'na man'gen, uamangko poraiatkubo, mande ong'atbo. An'ni tangka paisa aro gamjinran'ko cha'rik man'riknagipa Tracyna agre darangba don'ja. Somo sokjoko nang'ni nogiparangnaba jora ripeng an'e on'bo. Na'a angko dakchakchong'motbo Donring. Anga nangko jang'ni tan'a gimik mittelang'zen* ine inaha. Indake saksa dal'gipa officer gisik ka'tong dingchike mol molani gimin aro nogipa sak'nini 'future' ko chanchie aro an'tangko ua offcerni tangka paisa, gamjinna mikboke palenga gita daknikoba Donring jechakna man'jaha. Donringni maming cholan dongjachim. Indakesa Tracy aro Donringni bia ong'achim.

Tracyna darang panterangba mikchaa balnangaba dongjachim, maina, Tracyni ja'ara chononin samsa kora-chim aro uni mikkang bimangara do'ka manggisim, a'ba bolitchong gita dakachim. Donringko man'e Tracyde namen kusi ong'beachim. Indiba Donringni gisikode maming saloba Tracyko ka'tongchi ra'chakna man'jachim. Bia ka'ani bilsu gitamrang ong'engaha, indiba uamang salsaba apsan turam am'pak ra'a dongjachim. Tusioba dingtang dingtaga tusialachim. Donring uko ka'tongchi namnik-manchaede kimja ine Tracyba ma'siachim. Tracymangni indake jiksésani obostaranko ma'gipa pagipa aro darangba ma'sijachim. Uniba segipa donga ine chanchiarisa Tracyde

kusi on'gaiachim. Ua Donringchiko mamingkon nangja aro bi'ja. Ua se'ipa on'e nokona re'baenga uan Tracynade namen kusini aro ka'dongani. Donring Tracyko anti a'kan? cha'achi, birth day partychi, ba saobani biachi lokamatoba maming saloba rimangpa'jachim, maina, ua Tracyko jikgipa ine ripengskarangna aganna kratcha'a. Ripengskarangni jikgipade silsila. Jikgipa silako rime anti a'kang re'dilna haida darang me'asarangan namniktokakon. Indiba Donringde jikgipako ka'tongo ra'chakna man'jae gisiko dingtang dake chanchina a'bachengaha. Ripeng skarang aro officeni ka'rimskarang uko ja'kora do'ka gisimna agre na'a gipin me'chikko nikjajokma ine bal'ekarango Donringni gisikko bilongen su'tingerongachim. Ua salsalna gisik namgija dake chanchibarorobaaha. Ua Tracyko bisi (poison) on'e siatna gisiko chanchie ra'aha. Maina Tracyni giminan uni ripengrang uko rokomari dake chonnikbeengaha. Ua salsao bisi botolsako ra'bae nokni almario srik donaha. Maiba cha'anirang baksa Tracyna bisiko on'chapgen ine tik ka'e donaha. Gisiko chanchia dongoba ua bisiko on'nade chol ba pa'kujaengachim. Ua bikpil bawil chanchina a'bachengaha. Tracyni giminsa ua chakrikoba man'jok aro Tracyni giminan da'ode ma'gipa aro nogipa sakgnirangba ganna chinna, cha'na ringna mamingnan jajrenggija dongna man'engaha. Tracy bang'bata salon "lako nangmana aro iarangko nang' nodrangna on'bo" ine ba'ra kancha aro tangka paisarangkoba Donringni jako on'atrangachim. Tracyni gisik gnangana aro uni nama kamrangko chanchie, an'tangni gisik namgijaniko tosusae Donring namen be'en an'tiktakengachim aro gisiko dongsiksakengachim. Salsao ua office chuttini

salo, an'tang maruti gariko ra'e 'NEHRU PARK'-ona re'-
 angaha. aro Parkni ka'maona ong'onange chidareni ko-
 sakchipak doange, ro'ong dotsani kosako bolbijakrangko
 tom'e uno asonge cigaret pongsa so'bake, gingting gita
 wal'ku watprongate ma'marikit kattaran'ko chanchieng-
 achim. Uni asongenggipaoni adita chel'kalao bolbijak-
 rangni sraksrak gam'ako ua knana man'aha. Bolbijak
 gam'gipachipakko name sriksrik niate Donring ieko nika
 man'aha. uko na'siman'na (bolpoko poraiziparangna)
 ka'sine sriksrik agane donaignok. Uano saksa me'asa aro
 me'chik, ba'ra kancha ra'gija, il'leng siksak dake tusie
 dongengachim. Sawarang mancha ong'na nanga ine Don-
 ring name dake srik nia. oa, ua ua me'chikkode u'ina man'a-
 ha. Ua me'chikara Donringni office-o kam ka'eng'g'a uni
 ka'rimskanin jikgipachim. Donringni ka'tongo ka'onanga
 aro mitchiani nakatjolba'aha. Donring ua me'chikko kni
 salchimpake satkapbana sikahachim, indiba gipinni jik-
 gipa inesa chakchikbaiaha. Me'chikde silbeanchim. Silgipa
 me'chikrangni ka'tong gri, angke sko gri ine chanchie Don-
 ring jikgipako gisik ra'aha. Donring jikgipani bimang sil-
 jaoba uni ka'tong rongtalgipa chi gitan dake grikbea.
 Jikgipani kosako onia dakarangni gimin ua jikgipao kema
 bi'gen aro da'al dipet ua jikgipako name jakkalgnok ine
 chanchie jikgipako grongna gari ta'rakprete salbaengon
 uni gari truck gari bolsa baksa bilongen chagakeaha.
 Donringni gari nosto ong'aha aro Donringba bilongen
 be'en gimik jokom man'aha. Donringni 'accident' ong'-
 ako nikgipa manderang uko Civil Hospitalona ra'baaha.
 Donringni jokom ong'e 'hospitalo 'dongengako jikgipa-
 na 'kobor on'na re'anggipaba uani dingtang obosta
 ong'akosa nikaaha.

Uara indake ong skaaha. Donringni pent cholarangko 'iron' on'mane ba'rarangko almariko dona ine almariko kulion Tracy bisi botolsako uno nikna man'aha. Bisini botolko nikarian Tracy gisiko rokomari chanchianirang nakatba'aha. Rang'sen Donring uko namnikchong'motja aro kni dingsanigitaba ka'sachongmotja, maina, uara silaba silja aro ja'korasa ine gisiko su'tingjolagita chanchijolaiaha. Ka'sajani gimnan Donring da'onaba Tracy-ko dangtapsrangkuja. Uni gimn Donring duk man'na nangja aro ripengskaran'chikoba chonnikako man'na nangja. Namnikjaen uko Donring mamanzhiba da'ona kingking changsaba rimitanga dongja. Donring uni namnikagita sila me'chikko kimangchina, kusi ong'angchina. Gisiko suk ong'jaen ua ringe sinasa ia bisiko ra'baakon ine Tracy chanchiaha. Indiba Donringan tange dongchina. Ja'korra me'chik maming kamna choligijagipa, do'ka gita simgipa silgija bimangko ra'e, ia a'wikako janggitangna sikjaha. Tracy jako his'ini botolko ra'e, uko ku'ie ringataiaha. Dikdixanon Tracy mikpangpil nie jringjrotna mikchipangaha.

Donringba hospitalon siaiaha. Officerni noko dal'a dal'a manderangni garirang aro noksul songsulni manderang bang'baaha. Tracy aro Donringni apsan salo dingtang jingtang obostao siani gimin pilak sokbatokgiparang aiao inmanaha aro duk ong'tokaha. Officerba demechik aro phawarigipani siana bilongen gapbeaha.

Tracy aro Donringni gisepo mai ong'achim darangba namingko ma'sijaha.



SENG·WATNI TENG·A

Da'si pringonin Sengjide nokoni bachiba ong·katanaha. Da'o walni sku baiipilengaha indiba nokona re·bakujaenga. Nomil chadamberang indake waltinge roe donjarangko noksul songsulni manderangce nama inede chanchirongja. Maiba mangsongza dongesa indake waltinge saoba me'asarangming rorongga ine chanchiaia. Sengjini adatang aro bochitangde barandao asonge unan ramachiko nigame sengsoengachim. Sokbaningjani gimin uamang jiksesade gisiko namen jajrengengachim. Songadamode indita walona darang nokdangni manderangan simake dongrongja. Cha'e ringe darangan taraken tusitokaia. Bachiba re'angomangba Sengji maming saloba indake waltingede rorongja. Indide da'al Sengji mai ong'jok, maina da'omangba sokbakujaenga? Me'a bi'sa ong'ode dingtang kattachim indiba uade me'chik bi'sasa. Rikkit dangkit chanchie uamang jiksese gisik suk ong'jaengachim. Songadamoni townona kilometre bongarangde chel'gen. Sengchiko am'angna sikoba bachina am'anggen, indita walo ua mai dake townona re'anggen?

Sengchini adatangko Gringrang mingachim. Ma'gipa pagipade Sengchini bilsigitammang ong'mitingon sitokahachim. Gringrangsa Sengchikode chononi aldu-mittangbaaha. Gringrang jikgipako Sanje mingachim. Nosaregipako ua bi'satang gita jakkalbaaha aro ka'sabaaha. Sanjegita dake namgipa bochitangko man'na namen rasong gnanggipa ong'na nanga. Agilsako janggi tangna uamang jiksese namen dakgrikbaaha. Sengchikoba uamang alamala mande ong'atbrangaha. Pagipade a'songni jakgitelna dak-

grikpae baditaba chang patoko dongna nangachim. Gandhijini ideologyko namen rake jarikgipachim. A'song jakgitelna dakgrikanio maming bak ra'pagijagipa mande-ran'za jakgitelni ja'mande MP, MLA aro MDC ong'ang-tokjok, indiba kakketo rongtale janggi tanggipa mande-ran'ni mamingon biap dongjaha. Indake pagipani dak'angginin kamrangni gimin chanchie dongmitingon Maruti gari bolsa a'tilaona sokbaaha aro a'tilako garini lightchi teng'suataha. Garini do'gako oe Sengchi garioni ong'kat-baaha. Gringrang nogipako niksoe jajrengani komioba risikode namen sukjaha. Jiksese gate-chipakko name ni-soaha. Sengjini re'baengako uamang jiksese niksona man'aaha. Maruti garide dikdixanon andala baksa nangrimang-aaha. Sambaona sokon Gringrang nogipako sing'soaha.

: Sengji, maidake bachi re'ange indita walbajok ?

: Iana bateba walbagenchim dada, indiba bia angko gario rimbaani giminsa da'o sokbajok.

: Sani gari uara ?

Banchengni. Waltingre Managing Committee-ni Skul Sey-ni. Gringrang nogipako mamingko sing'-taijaha. Sanjesa ki'sang ki'sang Sengjini kuturiona uko ja'rikangpaaha. Jadasipile aro maibarangko chanchie Gringrangde barandaon asonge dongaiaha. Je ong'a ua namade ong'jaha. Saksa nomil walni sku bajiona kingking saksa me'asaming rorame dongako darangba namnikjawa. Iarang haida mikkangchi kratcha'gni obostarangkos me-soksoenga. Dongdik dongdike Gringrang rokomari katarangko chanehiaha. Pagipani tangmitingonin Gringrangko aro uamangni nokdangko manderang namen beber'a aro mande ra'beachim. Indiba ia nokdangon da'asal maiba a'sel

ba kratcha'ani sokbana sienga. Gringrang adita ka'onanga
gnang jikgipako chrikkale okamataha.

: Na'a okamachimma ?

: Oe. Sengji da'o mai dakenga ?

: Palongtango tugrange maikoba chanchia gita dake
dongenga.

: Na'a uko mikkangchi mikrakangchina aganbo.

: Indide on'tisa sengkubo. Bi'sarangko tusiatsrang-
kuna.

Gringrang barandao asongaoni chakate nokning-
chi napangaha. Unomitingo ding'ba dingengachim. Walni
andalan baksanaba uni chanchiarangba bate andalgripna
a'bachengaha. Tangmitingo ma'gipa pagipako son'ni
manderangni mande ra'bearangko gisik ra'e aro da'o uni
obostarangko chanchie Gringrang bikpil bawil ong'nik-
engaha. Je ong'anirangko altue maming ong'ja ine chan-
chie ra'aniara kakket ong'genma ? Gringrang an'tangkon
sing'engaha.

Jikgipani mi saako cha'na sikjaoba cha'gal'alaha.
Gringrang da'ororo ong'enggipa chasongni bewal baksa
dakgrike namen neng'beaha. Sengjiko ua chonnonin aldu-
mittange dal'atbaaha. Indiba da'o ua chubea a'bri kosako-
ni ga'akna am'engaha. Gueko jako ra'e ku'sikchi sikate
jikgipako Gringrang indake sing'ataha-

: Na'song mi cha'jawama ?

: Sengjide cha'jawa innenga.

Gringrang ta'rake nogipani kuturiona napange
Sengjiko indake innaha-

: Sengji, maina mi cha'jawana ?

An'tang be'enni ba'rarangko tarie aro palongoni

chakatbae Sengji adagipana indake aganchakaha-

: Mi cha'na sikjaenga, dada.

: Bachiba maibarangko cha'baama ?

: Bang'a cha'anirangko cha'baaha. Anga da'ode neng'asa neng'beengjok.

Indakmitingon Gringrang jikgipa Sanjeba ua kuturiona napbaaha. Gringrangde gisiko duk man'engama ka'onangengama mamingkon ma'sina man'jaengachim, unon jikgipa indine inaha-

: Na'a re'ange tusiebo. Sengji baksa anga on'tisa katta agangrikgen.

Gringrang maminoko ingija nogipani kuturioni ong'katangaha. U'ioba parakna amgijagipa sompiani gita dake uni gisikko bilongen sakna on'aha. Uni ja'man Sanje Sengjiko indake inaha-

: Na'a mi nimode angaba cha'jawa, Sengji.

: Bochi, na'a indake innabe. Angade cha'baahaba. Indinari na'a angna maina chanchia.

: Chanchiani katta ong'en'aha, Sengji.

: Haida, na'asa maiko chanchienga.

: Gisik ra'bo, anga iensalo nang' adatangko kima-chim, ua somoio na'a angni ia chonbatgipa bi'sagitan-chim.

: Angaba ua kattarangko aro somoirangko gisik ra'-kuenga, bochi. Na'an angko mande ong'na dakchakbaaha. Anga ua somoirangko gualkuja. Nang'gita dake namgipa bochitangko man'e anga namen Isolko mittela.

Sanjeni mikrono mikchi jingjang jingjang ong'aha. Sengjiba an'tang mikron mikchiko rakkina man'jaha.

Gisiko duk ong'bee Sanje nosaretan'ko indake inaha-

: Indide na'a da'o maina indake dakenga? Mai ong'-
jok nang'ni, Sengji?

Mikron mikchiko ripake Sengji indake bochitangna
aganskaaha-

: Bochi, na'an da'ode angni ma'gipa. Nangna an'a
mamingkon donujawa. Anga da'onaba maming namgi'a
kamko ka'kujaenga. Na'song angna indinari chanchie duk
man'nabe. Angaba da'ode bang'a kattarangko ma'sina
gisiko bil man'aha. Nang'ni angko jakkalbaako aro deme-
chiktang gita angna ka'saako janggi tanga ginik gual-
jawa. Na'a aro dada angni ka'tongode Gitel chachagita
sa ong'a.

Sengjini kattarangko knae Sanjeni gisiko dingtang
dake chanchia nakataha aro ua inaha-

: Na'a da'oba angko name dake ma'sikuja, Sengji.

: Na'a mai kattako aganenga, bochi! Angni ma'gipa
pagipa siani ja'man na'son yna agre ia a'gilsako sawa donga
angni? Nang'ni bi'sarangni ka'saa aro namnikanian ang-
na ka'donganiko ra'baa. Na'song baksa dongpaen angni
sikdikdik janggi tanganioba ka'dongani teng'ako nikna
man'a. Anga saksa ka'donggipasa ong'baenga bochi.

: Na'a da'al maina gisiko nangdikeani kattarangko
aganenga?

: Ong'ja bochi. Anga da'al angni adatang chonggi-
pako gisik ra'enga. Ua gisiko ka'donggijaniko man'e,
okkria cha'asiachi aro kangal ong'ani chi banachi satpa-
kako man'e mangkimaana sienggipa nokdangko nike
bachi re'angaha, da'onaba re'bapil'jaha. Ua sijokma
tangkuengama darangba uni koborko ra'jaha. Maina in-

dake ong'jok ? Iarangni gimin saoba aganchakgenma bochi ?

: Nang'ni da'al mai ong'jok, Sengji ?

: Da'ode anga dal'aha, bochi. Pifak kattarangko angaba ma'sina man'engaha. Waljatchirango na'simangni tusigipa kuturioni kan'dik kan'dik tong'tang tong'tang dake golporangko knae angaba gisiko ning'tue chianchironga dada ia nokdangko namen neng'skime aro kosto ong'esa chalaibaenga. Da'o dongenggipa nokkapna agre'a'an chian dongsrangja. Una agreba, dadani beton man'gijaan jachet ong'engjok. Na'simang mai dakgipa kostoo janggi tangenga uko angaba u'ienga, bochi.

: Indaken cholina nanggen, Sengji. Una agre mai chol donga, aganbo ?

: Uni giminan angaba chakkori ka'na am'enga, bochi. Dada saksanko nie dongalode cholijawa.

: Chakkori ka'gen inon chakkori man'aigenma ?

: Chakkori ka'na nangchongmotengaha, bochi.

Ka'sananga kattachi Sengji bochigipana rang'spee aganaha. Sengji maidake bochigipana unil gisikni dukko parakgen. Sengji da'onaba nomil ong'en dongkuenga. Me'asana bate me'chikrangna maiba maibarangko jakkalna nanga bang'bata. Ua maidake agangen ua blotuse patcha nangachim ine. Ua gisiko namen dogsiksaken achim. Uni dokmanda patgniba gin'na am'engaha. Dokmanda patcha gitalko namen nangchongmotengaha, india adatang jachetni dormohakon man'kujaenga. Indaka nokni obostarangko chanchie Senei chakkori ka'na gisiko tik ka'aha. Indiba ia kattarangko ua bochigipana maidake ma'siatgen Sengji ini dongsana bochigipa sing'skaaha-

: Na'a chakkorini kattako aganenga, indiba baoniko man'gen ?

: Tik ka'baaha, bochi.

: Mai chakkori ?

: Ianoni kilometre gittam chelao donggipa skulni skigipani chakkoriko.

: Skulo skigipani chakkorinaba komse kom hajaral chibongarangde nang'gen, indita tangkako nang' dada baoniko jugal ka'gen, Sengji ?

Aganna pa'jaoba dikdiksa jrip donge ka'tongo ka'donganiko ra'bae Sengji bochigipana indine aganaha-

: Pilakan tik ong'aha, bochi. Indiba

: Indiba.....? Mai indiba ? Na'a angna pilak katta-ko ku'mikchete aganbo, Sengji.

: Da'si angko Marutio salbagipa, Bancheng, uan tik ka'e on'aha. Uan Managing Committeeni Secretaryba ong'a.

: Indiba, ukode darangan cholon namgijagipa mechik gunda inesa ma'sitoka. Ua nang'na indinari chakkoriko on'gen ine angade ka'dongatjaenga.

: Uanto asol kattade, bochi.

Sengji jajae katta aganna man'jaha. Dikdiksa dongdike, uni ka'tong sagalo bilongen chipakkore satangako ra'chipe, gisikko ka'dongate ua indine aganaha-

: Ua angko walsana bi'enga, bochi.

Bochigipa Sengjini kattako knarian rang'san grapaha aro gisikko chanchiaha, ia a'gilako kakket ong'anio ka'saninggijanikoson chagrongna nangaia. Saksa rongtalgipa gisikni nomil ba me'chik, uni kakketanio aro ka'donganio, a'gilsako janggi tangna sikanio indake ong'siataniko-

a man'ronga. Bochisani gipakgrike grarmitingon, Gring-
angba Sengjini kuturiona napbaaha. Uaba parakna ampil-
gija kattarangko knae ka'tongo duk aro sakna man'aha.
Gringrangko nike bochisan bate grapsrangaha.

: Anga pilak kattarangkon knaaha, Sengji. Indaka
namgija chanchiarangko gisiko ra'bana nangja.

Gringrangba gisikode duk man'beaha aro uni ku'-
rangrang til'tilesa katta aganeaha. Ua indake inaha-

: Indake maming saloba ong'na man'jawa. Da'asalni
dipet na'a chakkori am'e Banchengchi re'angna man'jawa.

Gringrangniba mikron mikchi ong'aha. Indiba ua
an'tangko gisikko rakate indine Sengjina aganaha.

: Mingsa kam ka'gnok. Anga knalni dipet 'tution'
am'gnok. Tution ra'e hajalsarang man'oba mai namgijani.
Indake dakjaode nokdang choli Jawa. Tution poraiatani
maming namgija kam ong'ja. Iaba ge'sa rongtalgipa kam
aro ka'gni ong'a.

Adatangni kattarangko knae Sengji duk ong'aha
aro gisikko rakate ua iadine adatangko inaha-

: Dada angaba Mathematics-o Major pass ka'aba.
Angnaba ge'gnimang tution tik ka'e on'bo. Anga mande
ong'e manderang baksa ia a'gilsako janggi tangna sikenga.

: Ong'aigen, Sengji. An'ching indaken dakgnok. Anga
nang'naba tution poraiatna tik ka'e on'gen. An'chingni
nokdang indaken name cholina man'gen. Na'a seng'wat
gita mangmang on'tisa teng'aniko angna on'nangbo.

Pilakchin jripjrangsachim. Unomitingo wal seng'na-
ba bang'jaengahachim.

DO'DE MESARAM

Saoba me'chikni ku'ran angni bimingko minge ok-amako knae anga rang'san chaden dipaha. Ki'sangochipak-ko ni'ilate an'a saksa me'chik tangsim rongni dakuan-dako ganne an'chipak ka'din'suite re'baengako nikna man'aha. A'bachengode anga ua me'chikko ma'siatjachim, indiba sambaona sokbaani ja'man ma'sina man'naha. Chinga college-o apsan poraiachim aro subjectba apsan-kon ra'achim. Ua historyko ra'e M.A. pass ka'aha aro da'o doctorate-na research ka'enga. Ua Turaona indake sokbagen ine anga jumangoba chanchisoan dongjachim. Uni gimin uko niksoe anga naimen aiao inmanaha. Uni bimingko Dina mingachim. Ua A'chikrangni bebera'ani aro philosophy-ni gimin research ka'na inesa re'baachim. Ua angni saksa namnikbatgipa klass 'mate'chim.

: Dina, na'a iano maidake sokbajok ? Turao nangko nike angade bebera'nan man'piljaengaha. Anga Dinako inaha.

: Thank God. Na'aba angko u'isoaiaha. Na'a Turao dongenga litan anga ianona re'baaha. Mittela, nang'ni angko gualkujani gimin.

: Matko ina ? Nang'ko anga gualgen ? Nang'ko anga maidake gualna man'gen, Dina. Angni chadambeni pring seng'bamitingon anga nang'ko ka'tong salgjo aski rongsu gita dake tong'unikachim. Ka'saninggijasipa somoini giminsa da'o an'chingni dingtanggrikna pangao ga'akaha.

: Aganade man'ja pantemitingni gisikkode, leba ong-bo, ua kattarangko da'o golpojana. Na'a an'ko Balpakramona re'dilangbo. Balpakramni gimin anga bang'a

kattarangko ma'sina sikenga. Rama jaljol sakgni golpoe re'na man'gen. Chinga Balpakramona re'chakatangaha.

Dina saksa namen man'e cha'gipani demechik ong'a. Ua an'tang Embassador car-ko ra'e Balpakramni gimin ba A'chikrangni bebera'ani aro philosophy-ni gimin research ka'nasa Balpakramona re'angna am'engachim. University-o apsan poraimitingoni Dina baksa angni dingtangmancha nangrimani ong'achim. Chinga saksa sakgipnna ka'sagrikachim. Indiba chingni jumangrang chu'sokjaha. Sakgnian da'oba biade ka'kujaenga. Uni nokdangonin raka champenga dongani gimin chinga mik kangchina ja'ku de'angjaha. Ka'tongode da'oba chinga saksa sakgipinko am'kuenga. University-ko watgrikaoni da'ode bilsi skurangde ong'engaha. Dinade M.A. pass ka'ani jaman Assamni badiaba college-o lecturer ka'engaha. Embassador car-o re'joljolen ua angko indine inaha.

: U'ia Simseng, ia Balpakramon chengoni itihasang donnue dongenga. A'chiknisan ong'aigija, Indiani jatgimiknin itihasang ia Balpakramni buring, bolgrim, a'bri, a'kong, rongkol, rong'dot, chiring chibima, rong'srek aro a'patalrango somoni okningo mangkimaae jringjrotna dongenga. Iarangko che'em che'em gisik a'ningbitgipa manderang sandina changode India a'song gimikni itihasang-ko ia Balpakramon Janera gita nikna man'gen. Ramayana aro Maha Bharatrankoba ianon man'naigen. Dikki, Bandi aro Giting raniko ia chasongni A'chikrangde mitesa mingaijok. Chong'motde, uamang mite ong'ja, uamangan A'chikrangni pagitcham-ma'giticham aro atchu-ambirangchim. Jatangni pagitcham-ma'giticham ato atchu-ambitangrangkon da'oni A'chikrangde

u'ijae mitesa mingaijok. Ia A'chikrangni u'igijani aro g'na' anian A'chikrangni itihasko minokjok.

Anga angni jeponiko chu botol te'sa ra'angra'girako bikote "Dina, na'a gisik sajaode anga on'tisa chu ringna am'engachim" ine permission bi'aha. Unon ua "maina gisik saagen, ringbo, indiba na'a ia botolni chuko ringana bate u'i-ma'siani chukosa ringbo. Jatna, a'songna ka'saode na'a gisik a'ning bitani chukosa ringbo. Ia botolni chude mandeni u'ianiko simsak mikrakaniko salongipasa ong'a. Botolni chuchide songsarni aro mande jatni maming namgnian ong'na amja. Iarango napsrime dongean A'chikrang bang'a gamchata kattarangko, ku'siktangni oikorrangko, jatni itiharangko aro ambi atchutangrangkon gualaha, simsakna gisik nangbajaha. Da'ode chel'ao saobani ku'rangko rima rima dake knaagitasan, jatni itihasn gimin, jatni oikorrangni gimin, Dakbewalni giminba knana man'aiaha. Uni gimin botolni chuko ringe pekija, u'iani aro gisik a'ning bitani chuko ringesa pekbo, uasa jatna, a'song chigana, gisikni apalanina gimiknan dakchakgen. Unosa A'chikrangba gipin jatrangna bate ja'man chakjawaha".

A'chikrangni ku'sikde donga indiba bibalsa balkuia, jatde ong'a indiba ja'tingcosa sandie man'kujaen'a. Apalbegipa sagal rikamni an'chenggo gimaagimin sona ting'sako am'na jegita neng'nikani ong'a, uandake A'chikrangni ku'sikni oikorrangko, jat ong'baani ja'tingko ba A'chikrangni itihasko gualani aro simsakba'gijani an'chengrang pindape chasong chasong dongengaha aro uko bikotaniba da'ode altuani ong'jawaha" ine Dina aganaha.

Chinga basako Balpakramona sokeaha ukon angade

u'irikjaha. Dinani " hai an'ching ianon gariko done ja'a-chi roramaina " ine gariko dik dake dongdipataosa badita chasong tusie dongaoni rang'san simakbaa gita dakbaaha. Garini ong'katarian Dina indake sulsul mesokangna a'bachengaha.

* Ian Bandini jal'ang. Kanai chibimani chibisik chongipa chiring ong'a. Matchruni antiona re'na man'dikani gimin ba rama re'tojani gimin chengo Bandian ia a'kuang a'kongkepko ro'ongchi jal'ang chanbataha.

Sigimin mandena mangrapatgipa matchuko moe me-mang a'songona re'banitingo songo noko napna skang ja'su jaksue mesal cha'e neng'takmitingo matchuko ia Boldakon kae donronga. Uni gimin iakon matchu boldak karam minga.

Indaken Dina angko rimbitjojoe, Gitingni Suunte, Giting kera onram, Matchruni anti, Mebit Mebang, Sogin sa'ram, Muni dapram, Rangdokram, Chianggal ba chidimak, Me'mang mesal cha'ram, Chimite, Rong'mite, Ganchi So'ram, Dikkini ring, Mahadevni Mandir nok, Rong-jaleng aro maiba maibarangni gimin rikkit dangkit aganangkuaha.

Dinani kattarangko knae anga namen aiao inamana-ha. Ua indita kattarangko maidake baoniko ma'sina man'jok angade chanchinan changpiljaha. Dina an'tangde gipin jatsa. Samchi muni nangatako mangipagita dake anga Dinani ki'sang ki'sang ja'rike uni jeko agana ukon knatime dongaiaha.

Bon'kamao chinga "Gabil songgitcham, Do'de Mesaram" biapona sokeon sal napaha aro mikka balwa rak-

bana am'agita salgio aram simdapbaaha. Angni gisikode kena aro jajren'ani sokaha. An'ya Dinako indake inaha-

: Dina, mikka balwa rakbanaba donga aro indita wal-o ianoni re'naba dikdar ong'naba donga, hai re'gnokma?

: Mikka balwa rakbaode rakbachina, uan namen nambegen. Mikka balwako chakemangba da'al walode an'ching ianon dongai'en. Simseng, na'a an'ni sambaona re'babo ine jak samgniko snilate ua angko uni sambaona salangaha. Uni jakrang suuri gita chiktotachim. Da'oba changsatai an'ya Dinako rakkale indine inaha-

: Dina, hai re'chongmotbebegnok, tangode an'ching re'na namen mandikgen.

: Ihing | anga re'jawa aro nang'koba re'angna on'jawa. Da'asal nang'ming anga kal'grikna sikenga, an'ya nang'ming ka'sagrikna sikenga ine ua wakwakari ka'ding aha. Uni ka'ding wakwakani buiring bolgrim chikong a'kongrangonaba rong'chang gita jangangaha.

Uni ja'man mikka kima aro ripraprang balmikka baksa bilongbaaha. Mikka riprapni teng'anichi Dinani bimangko suurina bateba boke nikaha. Tik..... tik jajongni teng'agita daknikaha.

: Angni indaka bimangko nike na'a kenengama, Simseng ? ine Dina angko sing'aha.

Dinani sing'ako knaeba anga mamingkon aganchakna man'jaha. Angni gisiko namen kena napaha.

: Simseng, nang'ko anga bal'sa bal'ekengaba, na'a maina indake til'tile kenenga. Anga nang'ni sambao donga dipet nang'ko darangba maming dakna man'jawa. Anga nang'na ka'sachongmota. Nang'ko gualna man'jani gimin-an anga da'al nang'ona re'baaha, na'a angko ra'chakbo.

Dikdiksani gisepon angni be'en gimik chikgripangaha. An'ga mikronchi nikengoba aro gisikchi chanehina changengoba angni be'en bimang gimik il'lengnan man'jaha. Dina an'tangni ganding chindingrangko kingprak kingprak dake okatsrangaha. Andalbeoba Dinani komilong bimangko muni muktani teng'a gita ching'e nikaha. Mikka riprapni teng'ana bateba Dinani bimang teng'bataha. Nikengoba be'en bimangko il'lengna man'gija dake siboke dongmitingo ua angko indine inaha-

: Simseng, ia biapni biming "Do'de Mesaram, Gabil songgitcham" ong'a. Ia biapo chengo do'derang re'bae chrok mesarongachim. An'gaba da'asal ua Do'derangming mesana sikenga. Angni mesagija ruutengaha. Da'asal anga bon'kame nang'ni mikkango gisik nange mesachotgen.

Dina ua Do'de Mesaramo chrokna mesana a'bachengaha. Unon nibo, banoni chansokgija do'derang re'bae Dina baksa chrok mesapa'eaha. Nie dongana agre anga mamingko daknan be'eno bil man'jachim. College aro University-o poraimitingo anga Dinani mesaako nikachim arc ua changchongmotanchim. Indiba uni walo ua mairongpile do'derang baksa chrok mesaako angna agreba saobarang nikpaode aiao inmangenchim. Maina, ua mesachakgipa rong'patal aro a'arangba banggria gita dake moachim. Banoniba an'tangtangan doka dam'anirangkoba knana man'aha. Balmikkaba ua somoio rakbatachim. Ua on'tisaba neng'a gita dakjachim.

Wal seng'nachipaksa ua chrok mesaani balmikka komiangaha. Do'derangba an'tangtang bachian re'angtok-ok nikrikan nikrikjaha. Mesaan'ko dontonge ua angni sambaona ka'dingsmite re'bae angni ganding chindingrangko-

ba oktokaiaha. Uni ja'man Dina angni bilgri ong'e siboka gita dakgipa bimangko ka'maoni kosakona changni chang kurdimaha aro jaktan'chi be'en gim'kko rim'rokaha. Uni ja'man ua angni manggilong biman'ko rake girakkotaha. Una agreba angni biman'ko ua mai mai dakachim uko anga mamingkon ma'sina man'jaha.

Salgipino sumake una man'aha anga h...
engachim. Angni ripeng'ang angko nina ic'batokaha. Sak-sani jako anga News paperko ra'baako nikaha. Ripengni jakoniko news paperko ra'e nichengon anga Dimani photoko uno nikna man'aha aro uano indake sea dongachim-

A'GILSAKKO WATANGAHA

Ka'sara Dina,

Nang'ni Shillongchi re'angmitingo ramao 'accident' ong'e sianina nang'ko jringjrotna gimaatna nangoba, nang'ko gisik ra'anio chingni ka'tongo on'tisaba dimeljava. Nang'ni janggina chinga Gitelo pangnan bi'chakgen. Nang baksa lsol dongpachina.

Ma'gipa, Pagipa, jongada,
noabirang.

PYGMALION ARO GALASIA. (Galatea)

1 Pilak sea jotani a'bachensani jartingon donga 'Ka'saa'. Ka'saan a'gilsakode dal'bat-nambatgi, a ku'sik (language) ong'a. Indaken poedo, golpo, aro aro ro'ongrangniko Muri (tatu) dakanirangoba ka'saani a'ong'clala. A' gilsakni dal'dalgi'a 'Epic'-rangol'a ka'saan b'ap man'chenea. Epic-rangoni a'bachenge gual chason'ni sea jotarangoba 'KA'SAA'-ni ganchata on'tisaba dimelkuja' Kakket kat-tako aganode, dakani chi'batgi'aan (the sweetness of creation) mite-man'eni gisepo ka'sagrika'on jringjrotna don-nue dongenga. Greek-rangni poedo, goedo, golpo aro sol'a repanioba ia mite-mandeni ka'sagrikanichian ong'hata. Ka'sagrikani jegitaba ong'china, indiba Greek-rang ua ka'saani si'aniko aro rinokanikosa olakibata Uaman'ni golpo ba kahanirangoba mandeni chanchiachi jegita kna-toatna, chi'atna aro ka'srokatna nanga uarang pilakan dongtoka. Miterang baksa man'erangni nangrimani dong-ani giminsa miterang manderangni chanchiarangko an'sa-oatranga. Chanchian' mikronchi jekoba silnikbate nika-ran artist-rangni gisikko dingtang dingtang chanchiaona sokatranga. Ka'saani mite me'chik 'Aphrodite' aro a.gil-sakni artist 'Pygmalion'-ni ka'sagrikani golpoko na'si-mangni jako pakwatenga (Venus-ni dingtang bimingko 'Aphrodite' minga).

Cyprus a'songni raja Belus-ni depante Pygmalion. Pygmalion saksa Artist. Noksa salanio aro ro'ongko konge mande bimang'tarianio una agre ua chasongo da-rangba dongjachim. Rong aro brush, turi aro batalini kam'o ua indake changa sapachim uko sea jotachi parake

bon'atna amja. Salgini dal'bat nambatgipa artist Hepastus jegita, uandake Pygmalionba a'gilsakode-chim, Ro'ong, mongma wa'am aro gainchatgipa silgrakrangchi tarigipa, konggipa bosturang Pygmalionni jako janggi sika gita ong'pilaichim.

Indiba ia artist saksa me'chikna mitchibe'ipachim. Be'en an'chini daran me'chiknan ua mitchibe'achim. Noksa sa'anio aro ro'ongni bimangko konganioba uni gisiko me'chiknide maming bi'anan don'jachim uni art-o. Me'chikni silani aro be'enni rinokanirangba uni gisik noksikni chanchiarango maming sikaniko ba ding'ataniko ra'bana man'jachim.

Me'chikan jringjrotna ka'saani chin ong'baenga. Chasong chasongna me'chikan artist-rangni ka'tongo gital chanchianirangko ra'baronga, chakkio jo'ongrangni bilnape siachacha gita, me'chik me'asani gisikrangko salopna man'a, indiba me'chikni sila rinokaniko maiba a'selni gimin mitsa mitchiskaa Pygma'ion'le. Aiao inmangipa me'chikni sila nitoaoni an'tangko chel'ate rakkian haida bini janggini miksongani.

Me'asani bilakani, ka'dongani, dakgrikani aro do'o in atrangni gimin sala konganirang bang'bea, indiba, Pygmalionni sala konganio me'chiknide maming chinan dongjachim. Ua uni sala kongarango pangnan sripe dongaiaichim. An'tangni silsile sala kongarango nie ua namen kusi ong'a, indiba, gisikode ua namen dongsiksakrongachim. Banoba uni gisik maibani gimin bangbange donga gita daknikengachim. Pygmalionni sala konganirango be'en dongoba, uno janggi dongjachim, ka'tong dongoba

uno ka'saa dongjachim. A'gilsak dongoba ua a'gilsakko maming dong'ija gita jringjrotna bangbangsa daknikaia-chim.

Pygmalion an'tangde mamingko ma'sina man'jaenga-ha, maimancha uni ka'tong bario bangbangenga. Uni sala konganio maimancha bangki dongkuenga-jeni gimin ua an'tangan chu'soknikkujaenga. Salgimik kam ka'e neng'oba ua waljatchio jajongko nie donge an'tangni chadambe somoini bangbanganiko u'ina man'aha aro uan uni gisikko namen su'tingeaha. Uni sala kongani jegita janggi gri, uandake jajongoba bangbang mamingan dongja. Ua namen sikdikdik ong'nikengaha. Ua da'ode maiba gital rinokanirangko gisikode man'a sikengaha. Indiba me'chikde uni mitchibegirasa. Ka'sroka, rinoka ba ka'saarangkon uni ka'tongode ma'sija.

Pygmalion an'tangni chanchiachi brangatako man'e sikdikdik janggi tangna nangengaha. Ua gisikode namen dongsiksakengaha. Attamanti sikdikdik aro bangbang ong'nikanian uni gisikko namen dekho ka'beengaha. Indiba salsaode ua uni chanchian' jumangoni simakaha. Pa'ang pa'ang jajong namao ua saksa silbea me'chikni u'chibakanan re'baengako nikna man'aha. Chel'kalao ong'kuengoba uni ja'a ga'baani gam'arangan chiringni chi jokanga gita namen knatoachim. Pygmalion alao inmanaha. Silbegipa me'chik beanbebe uni mikkango re'bae chadengeaha. Me'chikni indita sila aro rinokani uni sala kongarango dongan dongsrangkuja, Ua indake silaniko aro rinokaniko chanchinan changkujaengachim.

Chong'motgipa artist-rangde pangnan sila aro rinokanikosa olakkigiparang ong'a. Silgipa je bostunaba artist-

rangni gisik-ka'tong'e nom'aia ba uarang uamangni gisik-ko salaia. Me'chikna mitchirakgipa Pygmalion dikdiksanon me'chikni silana rinokana gisik nom'jolaiaha. Me'chikni silaniko aro rinokaniko nikkujaode uni sala kongani (art) chu'sokani ong'kujawachim. Jadu montol daka gita Pygmalionni gisik jarachange nitate dongaiaha ua silbeaniko. Ua katta aganan changpiljaha aro uni be'en jadasike dongaiaha. Sambaona ua silbegipa me'chik re'baaha aro ka'srokbea ku'rangchi silbee ka'dingsnite 'na'a maibako agangenma artist' ine sing'aha. Chiringni chu'jokonangani gam'a je'gita knatoa, ua me'chikni ku'rangba uagitan knatoachim aro ka'srokbeachim. Pygmalion uni chanchiachi jarachange dongaoni simake 'anga artist ine na'a maidake ma'sia? Na'a angko skangonin ma'sialua?' ine ua silbegipa me'chikko sing'aha. 'Anga nang'ko namien ma'sia. Na'a me'chik jatna mitchibegipa Artist, Pygmalion' ine ua me'chik inskaaha.' O, uni giminsa an'tangni sila bimangko mesoke angko mikbokatna re'baama na'a, indiba na'a sawamancha?' ine Pygmalion sing'skaaha. 'Anga saksa me'chik' ine ua me'chik aganchakaha. 'Nang'ni ku'rangko knae kana aro ku'maba agana man'gen na'a saksa me'chik, indiba na'a sawa me'chik, jean angni ka'tongko rinokatna aro ka'srokatna man'aha aro Pygmalionni jringjrotna pante ong'e dongani toposako (meditation) gimaate ka'saaniko chanchina angni gisiko ra'baaha. Aganbo na'a sawamancha, bano nang'ni song aro sawa nang'ni pagipa?' ine Pygmalion ua me'chiko sing'aha. 'Ia me'chikni gimin ui'e nang'ni maming lap ong'jawa. Anga ui'a na'a maina angni gimin u'ina sikenga. Angko na'a kema ka'bo, nang'ni indita salni toposako (meditation) dek-

to ka'ani gimin,' ine me'chik aganchakaha. 'Angni topo-
sako dekto ka'e na'a maming dosko daka ong'ja,
batesa artist Pygmalionni andalao dongeng'ipa jan-
giko nang'ni silbegipa bimangni ten'anichi angni
gisikko mikaoataha. An'ni me'chikna mitchi-
ani aro gisikni gaora da'al siaha. Me'chikan artist-
ran'ni jan'giode gelna man'gijagipa ong'a ine nang'ni
silanian da'al angna mesokaha. Gisik gisik angni an'en-
gipako man'aha, indiba, anga chu'soksrananikosa nang-
en'a. Anga da'ode chi ringna sike mikchak michak dake
mikka chi tingtotsana sengsogipa do'rong(chatok) gitasa
ong'aajok. Nang'ni angna re'baako anga namen namnik-
aha. Angni andalao dongenggipa jang'ina nang'ni ka'sa-
ani chakki ten'china, ian angni nango mol'molani. Man-
genma na'a an'ni chame ong'na ? Nang'na ka'sae anga
a'gilsako mingsingna man'jawama?' ine me'chikko inaha.
'Indake maming saloba ong'na amjawa, Pygmalion' ine
me'chik aganchakaha. 'Maina? maina ong'na amjawa ?
An'a saksa a'gilsakni nambatgipa artist, Pygmalion. Indi-
de badia me'chikni ka'saachi angni jang'ni chu'sokaniko
man'gen ? Na'ara mai a'selni gimin angni ka'saako ra-
chakna jechakenga ? Iara silani gimin nang'ni gangbinga-
ma, ma angan nang'ko ka'sana krajama ?' ine Pygmalion
ua me'chikko inaha. 'Nang'ni chanchichipa mingsaba
kakket ong'ja. Anga nang'ni angna ka'saako jechakna
sikja, indiba, anga chol gri. Ia angni silani gimin gaora ba
gangbinganiba ong'ja aro nang'ni kragijaniba ong'ja.
Asol kattade, nang'ming aro angming ka'sagrikanio Salgi
aro a'gilsakni dingtanggrikanisa ong'a,' ine ua me'chik
aganaha. Unon Pygmalion ia me'chik indide Salgio dong-

giṛa “KA·SAANI RANI’ Aphrodite”-sa ong’na nanga ine ma’siaha, maina, indake silbegipa ia a’gilsakni darang me’chikba ong’na kraja. Pygmalionni gisikni kattako chanchiman’jok. Angni gualaniko kema ka’bo’ ine Pygma’sina man’e ‘Oe, angan Aphrodite, Sal’ini mite me’chik, Ka’saani Rani’ ine ua aganaha. ‘Anga n’ijaesa nang’ko chame dake chanchiman’jok. Angni gualaniko kema ka’bo’ ine Pygmalion kema bi’aha. ‘Nang’ni ia kakket kattako kurachakani gimin anga namen kusi ong’a. Ia nang’ni dos ong’ja. Indiba mingsa katta-kosan anga nang’na aganang’na sika, uara me’chik jat mitchiani ong’ja. Me’chikni ning’o donnue dongenegipa rohosoko (mystery) na’a ma’sikuja aro uni chu’gimik silaniko haida na’a da’oba nikkuja,’ ine Aphrodite, mite me’chik aganaha. Unon Pygmalion indine inaha, ‘O | ka’saani Rani, na’a angko kema ka’ahaode, angni sing’aniko ang’na aganang’bo. Je me’chikni silaniko anga mikrontangchi nikaha, una angni ka’saaniko on’kan’man’ahachim, chanchian’ jumango kusi ong’mitingo rang’san anga rang’sitna man’jaha, anga maidake salrangko re’atgnok? Skanggitan jang’gini sao sarapko ra’e sikdikdik dake dongna nangaig’nok. Sikdikdik anga maidake donggen? Angni mai dos, ka’saniara duk-nisanma?’

‘Indake ong’ja Pygmalion, na’a ma’sisretnabe. Ka’saade namen dal’a, ka’saa rinoka. Ka’saa jang’giko rasong chaa’a, sianiko jringjrot tangata. Dikdiksani gisepo na’a angna ka’sana a’bachengon na’a nang’ni janggitangko mande ra’aha ba janggitangko gamchatnikaha. Anga nang’na rattiangenga, nang’ni ka’saa pangnaba gimaajachina aro

Jringjrotna tangbangchina. Na'a mikrakbo, gisikko teng-atbo. Ka'saachi nang'ni sala kongani ba 'art' chu'gimik chu'sokani ong'china' ine Aphrodite, ka'saani rani unon gimaangaiaha.

Uni gisikko salopgipa aro dongsiksakatgipa, indiba, indakpile kusi ong'atgipa sal somoiko ua chasongoba cha-grongkujachim. Me'chikna ka'saani indaka kusini saknako ua man'kujachim. Saobako gisik ra'anichi uni ka'tong da'al grapeugaha, indiba ua gisikni saknako ba dongsiksakaniko darangna parakna amjaha. Ku'sikchi parakna amgijagipani bimbingan me'chikna ka'saanima.....jringjrotna bon'changgijagipa me'chikni ka'saama ?

Pygmalion an'tang ka'rimra biapona re'bae, uni salgimin konggimin ro'ong aro mongma wagamni murti (statue)-rango an'saoani aro janggi gri dake nikaha. Indita sal uni sala konganiko ua mamingan gamchatgija gita daknikaha. Ua da'ode gital an'saoataniko man'e, gisiko dontonggijagipa sikaniko ra'e, ua jako turi aro bataliko ra'e, suurigita dake bokgipa mongma wagamko sol'na repna a'bachengaha. Sal aro walkon ua u'ipil'jaha. Gisiko miksonganiko chu'sokatna ua pagla gita ong'pilaha. Ua a'gilsako darangba nikkugijagipa me'chikni bimangko rinokbee, silbee dakna jotton ka'aha. Gisiko jegita chanchia uagitan dakba dakbebeaha. An'tangni taningko aro jaktangkon ua bebera'pilna man'jaha. Ua murti, silbegipa aro rinokgipa me'chik sraksrak ong'aha. Indiba ua sani mikkang bimangko salman kongmanaha uko an'tangan u'ijaha. Sambao re'bae name dake nioa ua aiao inmanaha, uara ua mite me'chik Aphrodite-ni mikkang bimanggitasa tiktak ong'achim. Ka'saani rani Aphrodite-ni mikkang

bimangkode ua tarina sikjachim, maina, ukode Pygmalion mande ra'a aro olakkirongachim. Una agreba mite me'chik-kode mande maming saloba man'na amja. Indiba ua ka'saani rani Aphrodite-ni mikkang bimangko nikchengaonin uni ka'tong sagalo bilongen chipakkore satengachim. Ia murtiko (statue) ua an'tang jakchi sala kongani gimin unan Pygmalionde ka'saa napaha. An'tangni indakpile salna kongna changa sapanikon ua bebera'na man'piljaha. Uni bimingko ua 'GALASIA' ine mingaha. Galasiani be'en bimang gimikon ua jaktangchi rim'rokaha. Uni mikronko, pe ko, jakko aro uni a'bri tim'gniko gisik ka'tong on'kange ku'dimrongengachim. Uni ja'ako aro ja'pingrangko rim'roke ua ia me'chikde janggi gri murtisa (statue) ine chanchinan gualaiaha. Changnichang ua murtiko Pygmalion gipakkote ku'dimrongengachim.

Galasiana ka'sae Pygmalion pagla gita ong'pilengaha. Walantian ua tusigija Galasiani bimanrangko rim'rokarian dongrongengaha. Pringode ua namen nom'bokengaha Galasiako man'gijani saknaachi. Indiba Galasiako watna man'jawaha. Galasiaan uni ka'saa aro ka'sagipa. Ong'china ua sigipa ba janggi gri, indiba Galasian uni janggini togigijagipa kakket poedo.

Rokomari ganding chindingrangko uni ka'sabegipa janggini murtina ganat chinataha. Gitoko, nachilo, jako aro ja'o pilakon gamchatgipa bosturangko pataha koaha. Murtini nagande bimangko pindapataha. Uko Pygmalion an'tangni tusigipa kuturiona ra'angaha. Ua sriksrik uni ka'saako Galasiana parakaha.

Janogi gri ka'tong gri murti baksa Pygmalion basak chasongna dongchagen. Ua neng'pilengaha aro chaktoja-

engaha. Salsao na ka'saani rani Aphrodite-ko gisik ra'aha aro gisik ka'tong din'chike indine inaha, 'na'a ka'saani rani on'chongmotode, ka'sagiparangni gisikni saknako ma'sina man'ode, angni cha'chipil'ijagipa ka'saani sakki on'ode, indide na'a Galasiako baljanggi sikatbo, angni ka'saako chu'sokatbo. Aphrodite, jring'jrot jrip donggipa ku'siko na'a ku ran' ong'atbo, ro'ongni ka'tongko rinokatbo aro ran'krepe donggipa ku'chilko moatbo, ka'ding-atbo.

Kakketo ka'sagrikgiparangni gisikni saknarangko Aphrodite ma'siajachin. Saoba gisik ka'tong dingchike uo bi'ode, ua maming saloba uko jechakron'ja. Indaken Aphrodite, ka'saani Rani, Pygmalionni bi'akoba knachakaha.

Artist-ni ka'sabegipa chame da'oba jring'jrotna tusi-aoni simakkujaenga. Janggi gri, maming moani gri uni bimang. Salanti gitan Pygmalion ua ro'ongni janggi gri Galasiani bimaneko dangtape n'aha aro uni suuri gita chiktotgipa ku'chilo ka'sae ku'dimaha. Indiba.....indiba jara mai? Ia sani ku'chil? Mongma wagamniko tarigipa ku'chil an'tangtang mona a'bachen'aha. Ka'sin ka'sin biman' dingtangbana a'bachen'aha. Galasiani ro'ongni biman'o ding'ani sokbaaha, be'enni ja'dilrango an'chi jokengaha.

Jajrengang Pygmalion rang'san chadengaha. Ua nitate don'aiaha. Bebera'tojaoba ua ong'chongmotengaha. Galasiani be'en bimang gimikon an'chi sokaha. Uni be'en bimang namen so'omaha aro rinokaha. Uni mikkang aro pe ba gitchak gitchak namen silbeaha. Pygmalion namen aiao inmanaha. Ua jumang nika gita daknikman'aha. Bebera'na man'jae ua Galasiana ganatgipa ba'rako kike

chelni paktangtango donggipa a'bri bo'rot tim'gnini jat-
chio nachil pa'dite knatimaha aro ua jagokaha. Ia ro'-
ongni bimang rang'sitna a'bachengengaha aro mikronba
mikjapengaha. Jringjrotna tusie donzaoni da'osa sima-
kengagita ua daknikman'aha. Chong'motan ia ro'ongni
bimango janggi sokaha. Mikgilakarian ua skanggi'a
me'asakosa nikchengaha.

'Na'a sawa'? ine Galasia Pygmalionko sing'chen'aha.
Sagrechacha gita kakkete, nitobea gita rongtale Pygmalion
'anga me'asa' ine aganchakaha. 'Indita sal anga bano
dongachim?' ine Galasia sing'taiaha. 'Angni saknao' ine
Pygmalion a'anchakaha. 'Indide ianona aneko maina
ra'bajok ?' ine Galasia sing'taiaha. 'Me'chik gride me'asa-
ni chu'sokani dongja. A'gisioba pul balmala, uni gimin' ine
Pygmalion aganchakaha. 'Indiba pulara a'gisiko chak-
chikna man'genma' ine Galasia intaiaha. 'Man'aigen.
Na'a angni ka'sabegipa janggini ripeng ong'gen. Ka'saa-
chi a'gilsakkon amna ama. Ka'saani dictionary-ode am-
gijani mamingan dongja. Indiba na'a maina indita jajreng-
enga, o, angni ka'sara?' ine Pygmalion inaha. 'Nang'ni
saknani chimik ong'esa angade atchiaha, anga nang'ko
kusi ong'atna man'genma ? ine Galasia inaha.

Ka'tongni noksiko chimonge dongipa angni mikchini
mukta na'an. Nang'ni ia nitogipa bimang angni mikchi
tingtotprakchisa ong'baaha. Angni duk kosto chakchika-
chisa anga nang'ni bimangko tarina amaha. Ka'sabegipa
Aphrodite, ka'saani ranini jakchisa nang'o janggi sok-
baaha. Nang'ni bimingko anga 'Galasia' donaha. An'ching
da'o ka'sani sagalo kusi ong'e sakgni napolna hai aro ua
ka'sabegipa, ka'saani rani, Aphrodite-ko mittelna.

Indakmiting somoion Aphrodite re'bae, 'na'a kusi-
 ma Pygmalion' ine sing'eaha. 'Anga namen kusi' ine Pyg-
 malion aganchakaha. 'Indide na'a da'ode ku'rachakgenma,
 je me'chik mitchiani ong'ja ? Artist-rang me'chik gride
 maming chu'sokaniko man'na amja. Ka'saa gri rongtalani-
 ko chanchinan man'ja' ine Aphrodite inaha. 'Angko kema
 ka'bo, rani. Angni gisikni gaorako ianon bon'ataibohà'
 ine Pygmalion kema bi'aha. Pygmalion aro Galaśiako
 jringjrotna tom'tome dongchina pattie Aphrodite, KA-
 SAANI RANI, Olimpūs a'briona re'angpilaha.

BOKSIS

Walgimik Bencyde mikgilan sikjaha. Pring bri baji-mangonisa uni on'tisa namkale mikgil sikengachim. Indiba simake niahaoara segipade palangon dongjaha. Mejal walonin Bencyde chanchie dongengachim, da'alde segipako sing'teksranggen, uni mai dosni gimin da'roro u'ming katta aganjaenga aro pringonin bachina re'angenga, bano cha'enga ringenga. Skangde somoi gitasa cha'e ringe, au miksue office-chi re'angrongachim aro office-oniba ta'raken nokona re'barongachim. Pangnan ka'ding an'senge kusi ong'en dongrongachim. Bencynaba maiba mairangko ra'barongachim. Indiba da'rorode uni mikkangkong nikna neng'engaha. Darang marang nikna skangan pringonin nokoni ong'katenga aro attamoba walosa re'baenga. Bencyni segipako Dimring mingachim.

Da'ororo Dimringni mai ong'aha Bencyde mamingkon ma'sina man'jaengaha. Mai ong'jok Dimringni. Jabrirang ong'engaha uni indake dakanirang. Waljatchimangosa noko re'baenga aro pringonin ong'katangenga. Basakoba noko dongoba Bencyko gelesa dongna jotton ka'enga aro Bency maibako sing'oba kan'dike aganchake bon'at-aia. Ia Dimringan changsade Bencyko indake inachim, "Bency, anga nang'ko angni janggin' ripeng dake man'e indake chanchiman'a, haida anggita dake kusi ong'batgipa ia a'gilsako darangba dongjakon. Chong'mot, na'a angni sambao dongode anga jringjrot kusi ong'e ka'dinge donggen."

Indiba da'al | da'ode Bency pangnan uni sambao

Dongenga, Dimring indide Bencyko gelnasa dakengama ? Baojok Dimringni kattarang aro uni Bencyna ku'mikahetarang ? Dimringni kusi on'ge ka'din'ge dongani saltang da'o bachi gimaajok ? Indake gisiko sing'ani nakatarangko aganchakna darangba dongja Bencyna da'al. Ma'marikit segipani gimin chanchie 'seating room'-ni chair-o asonge dongmitingon ua nokni bera-o sitie dongipa Calender-konie da'alde June jaani 6 tarik ine u'ina man'aha. June jaa-ni 6 tarik Bencyni atchiani salchim. Segipa jikgipa ong'ani bilsu 6 mangde ong'engaha uamangni. Bilsiantin Dimring June jaani 6 tariko Bencyna gamchata bosturangko boksis on'rongachim aro "special boksis" ine ku'dimrongachim. Indiba da'alde Bencyni tusiaoni chakatkujaengon Dimringde pringonin bachiba re'angaha.

Bency re'anggimin salni kattarangko chanchina a'bachengaha. Uamangni nokdang namen kusinichim. Dimring una ka'sabeachim. Bia ka'ani ja'manba Dimringni indita ka'saako man'gen ine Bency maming saloba ka'dongjachim. "Angna indita ka'sanabe. Basakoba nang'ni angna ka'saa komiode angade chakchikna man'jawa" ine Bency Dimringko inrongachim. Dimring Bencyko ka'bako gipake, ku'dime, "jensalo angni nang'na ka'saa on'tisamang komigen, unon na'a chanchibo ango maiba me'mang ba 'bhoot' napaha" ine Dimring ka'dinge inrongachim. Bia ka'ani bilsu gittamrangni ja'man Bency bi'sa saksa man'a sikachim. Bi'sani gimin aganoba Dimring mamingkon aganchakjachim. Bi'sa saksamang man'na sikbee Bency "Gyneocologist" (me'chikrangni saaran'ko uibatgipa Doctor) doctor-rangchi 'chek up' ka'beaha aro Doctor-rang Dimringkoba 'chek up' ka'china aganrongachim. In-

diba Dimringde ukoba doctor 'chek up' ka'china aganenga ine aganoba maibarango pa'sike somoi jokja ine bon'at-aiachim. Indaken sa' sa'na Dimring Bency-oni chel'angna a'bachengaha. Uamang jiksesani wiserio indake chel'grikani ong'en ine Bencyde chanchian dongjachim.

Batangimin salni kattaran'ko chanchie badita somoi re'angaha Bency u'ian u'irikjaha. Asongaoni chakate babilsichi re'angna dakon ua tebil ko'sako Dimringni diary-ko nikaha. Hai'a da'alde Dimring an'tangni diary-ko ba donnue donangna gualangahakon. Dimring pangnan diary-o mai maibarango see donronga ine Bency ma'sio-ba maming saloba ua diary-ko nina jotton ka'jachim. Gisiko suk ong'jae Bency da'alde diary-ni jakprakkon oprake poraiangaha. Rang'san ua diary-ni jaksao Dimringni indake see donako nikna man'aha.

"Da'asa'de angni namen gisik ra'ani sal ong'a. Anga nangchongmota kamni gimin angni ripengni nokchi re'angachim. Uamangni noko anga saksa me'chikko grongha. Uni biming Silarina. Bimingni knatobea gitan uni mikkang bimbang namen silbea aro ku'rangba knatobea. Uko nikode darang mandean una ka'saa napaigen ba ka'saman'aigen. Silarinani gimin angni ripengni ku'siko knae anga una ka'tong rinokpile bate ka'saa napaha."

Uni ja'manba Bency diary-o see dongiparangko gisik nange poraianguaha. Diary-ni jakprakon Dimring Silarinana ka'saani kattarangko seachim. Pringo office-chi re'angoba ua Silarinako grongangenga aro office joka ja'manba ripengtangni nokchi re'ange ukon grongbaenga. Basakoba basakoba uko rime rona re'angrongani giminba ua diary-o sea dongachim. Uni ja'man mejalo ba June

Jani 5 tarikni diary-ni jako seakoba Bency poraiaha. Uno Dimring namen rongtale indake seachim. "Silarinako wate anga dongna man'jawaha. Uko anga je cholchiba man'chongmotna nangen. Uni gimin anga angni ripeng baksa agangrikman'aha. Angni ripeng Silarinako angna pakwatna ku'rachakaha, indiba, ua angni jikgipani giminan on'tisa kenchakenga. Bency Silarinako nokchakna man'genma ? Anga angni ripengna aganaha. Bency angni jikgipa ong'a, u'ming anga bilsu 6 mang nokdang dakaha, uni gimin angni jikgipako anga namen ma'sia. Ua angni sikaniko maming saloba jechakjawa. Angni ripeng Silarinako angna pakwataha. Knal anga ang' ripengni nokoniko Silarinako rimbagnok. Knalni dipet Silarina ianon donggen, ia noko."

Segipani diary-ko poraiman'esa Bency u'imaraha, uamangni nokdango banoni maidakgipa gondogol ong'baenga. Silarinaan uamangni nokdango gring'gitchang ong'atani a'sel. Indiba ia Silarinara sawamancha ? Maina ua indake gipinni nokdangko gondogol ka'enga ? Dimring indake dal'a chanchianiko jako ra'na skang Bencyni gimin on'tisaba chanchijajokma ?

Da'asal pringonin Dimring Silarinachi re'angaha. Haida nokchi re'bajokode Silarinakoba rimbajomaba donga, indiba Bency ? Man'jawa, uni dongengon saoba me'chikko rimbaako Bency chakchikna man'jawa. Biki bawil chanchia amjae Bency bisi ringe sima'tik ka'aha. 'Tik-20' ru'datni samko (bisiko) ua botoisara'bae'ba-lis ning'o donau donaha. Dimring ero Silarinako apsan re'baako niksonasan ua sungoe dongalaha.

Ong'arek ong'jarek kattarangko chanchie dongmi

tingon 'calling bell' gam'aha. Dimring aro un baksa Silarinan re'baengaha ine Bency chanchichipsoaha. Ua antangko namen nom'boke nikaha aro do'gaonan ua chakatangna man'jaha. Noko kam ka'gipa me'chikmasa do'gako oataha. Bency uni balis mitapo dongipa bisini botolko changsatai rim'ame niaha. Dimring nokningona napbaaha. Ua Bencychiko niate ka'dingsmitaha. Badita jaarang ong'engahachim Dimringni ka'dingako nikkijaan. Silarinako man'ani gimin da'ode ku'chilo ka'dingani sokbaaha Dimringni. Indiba nokningode Dimring saksasan napbaaiaha, Silarinara bachijok ? Bencyni ka'tong sagalode ka'onangani, mitchiani aro chanchichipilani chipakkore bilongen satna a'bachengaha. Bencyni mamingko sing'na skangan Dimringan ku'rang indake on'chengaha.....

"Bency, da'al nang'ni atchiani salbamo, nibo anga nang'na maiko ra'baaha" ine Dimring a'palchipakko mesokataha. Ka'sin ka'sin dake saksa me'chik bi'sa nokningona napbaaha. Ua bi'sani bilsi haida bilsi gitammangde ong'gnok. Bency aiao inmanaha. Ua asongaoni chakatanggalgale ua me'chik bi'sako gipake peo, jako aro kopalo kusi ong'e ku'dimchotaha. Dimring inaha "Bency na'a bi'sa am'achimbamo, ia bi'sakon anga nang'na ra'bachijok. Angade bi'sa atchiatani bilko chono 'accident' ong'aon gimaataha. Anga nang'na skangonin aganna sikachim. Indiba na'a gisik saanaba donga ine aganjachim. Ian Silarina, uni ma'gipa pagipaba 'accident' ong'en sitokahana. Silarinani gimin anga nang'na skangan agangenchim, indiba nang'ni atchiani salosa ia bi'sako nang'na on'gen ine gisikosan chanchiche dongachim. Da'ode aganbosong, ia angni boksisko na'a sinama sinja, namnikama namnikja?

Bencyba Dimringko gisik chanchichipile Silarinana
amitani gimin kema bi·aha aro “iana bate nambatgipa
maming boksisan ong·na man·ja” ine Bency Dimringni
ka·bako sko done aro uko jaksamgnichi gipakon uni ka-
tong chiringni chimik an·tangtang mikron gita jo·olbaaha.

KA'SAA ATCHIRAMASACHIBA

Songrena sikmanchaen chinga ripeng sakgittam Mumbai-ona re'angaha. Mumbai-ni nina nanggni biaprangko salsnina kingking niaha. Salsni Mumbai-o roani ja'man sal-gipino chinga Guwahati-iona direct rel garini ticketko ra'e Robibar pringoni 'Chhatrapati Shivaji Terminus (VT)' stationoni rel gario gabaaha. Chingni kuturio chingna agreba sakgipin sakgni manderangba dongpaachim. Sak-sade rel garini kuturini noksiko jripjrip asonge dongengachim aro sakgipin jean bilsa sotbribongarangde ong'gnok, uara rel garini kelki gita a'palchiko niwate dongengachim.

Chinga ma'manti subject-rangni gimin golpoe bu'rok su'rok dake balekgrike re'baengachim. Politics-oni a'bachenge a'songo bosturangni dam bariaona aro bon'kam o A'chikrangni na'kam kapakode, hotel-rangni be'en bitin song'arang mamingan sokja inaona kingking golpoe adi-tade jegrikagita ong'angpilaha. Unon angni ripeng saksa golpoani 'topic'-ko bodolatna gita 'na'song saoba me'-mang ba 'bhoot'-ko bebera'ama ? anga an'tangde iarang mamingkon bebera'ja' ine agana a'bachengataha. Ripeng-rangni gisepo bilsibatkalgipa, Dingrin, 'memang donga, na'song nikkujaesa, nikjokosa chagakjokosa na'song an-tangan ma'sigen' ine inaha.

'Oh ! indide na'aba me'mangko bebera'gipama ? Nang'ni me'mang Saheb-ara ta'rakprete rel garini re'mi-tingo mai dakna man'gen ?' ine Gojen ka'dingaha. Dingrinde gisiko kensike an'tangchipak donggipa kelkiko chipataha. Chingni kuturio gabapaenggipa saksa me'apa

chadengaha aro unisambao donggipa kelki rang'san oa-gita dakaha. Ua mande chingchipakko niate 'ia kupuriona me'mang re'baani maming aiao inmanni katta ong'ja, je-
 citaba uade re'bana sikode re'bana amaia' ine, aganaha. Dingrinde gisik nangbee aro kensike 'bebema' maidake re'bana man'gen ?' ine ua mandeni sambaona re'ange asongeaha aro sing'eaha.

Ua mande rang'san maibana jajrenga gita dake kelki gita a'palchiko niwingwangate 'Pritina jegita re'baachim uaba apsan dake re'baigen' ine aganaha. 'Sawachim Pritinara' ine Dingrin gisik nangbee sin'ataiaha. Unon va mande jajaa gita dake aro sing'aniko aganna sikbregija gita dake, 'maming ong'ja, ua darangba ong'ja' ine jrip dongaiaha, 'Pritina sawamanchachim uko chingna ka'sapae aganbo, chinga knana sikbeengjok' ine Gojen inaha. Jegitaba ia manderangna aganan nanggnok ine chanchie jechakna chol man'jae 'anga gualachim, jeba ong'bo, na-songna anga Pritinani gimin aganaignok, knabo. Indiba angni aganmitingo gualeba darangba mamingko ango sing-na man'jawa. Bebera'ode ra'bo, ra'jaode ra'ja' ine ua mande aganaha. Chingaba uni katta gitan manie jrip knatimaiaha.

Ua batanggimin salrangona gisikchi bitinange indake aganna a'bachengaha. 'Anga kangalbegipa nokdangni bi-sachim. B.A. pass ka'ani ja'man, da'a mande ong'na angni gisiko ka'donga aro sikani dongachim, Indiba mandeni a'gilsako janggi tanganio namen neng'nikani bang'bea. Pritina baksa gronggrikaoni angni gisik-ka'tong dingtang ong'baaha. Chinga saksa sakgipinna namen ka'sagrikaha. Angni ka'tongo kusini chimik jokna a'bachengahachim. Indiba chongmotgipa ia a'gilsakni bewal gita ka'tongo

su'tingeako man'e, angni chanchiarang aro angni jumangni nokdring be'kininge biginchi pilaha. Pritina pagipa namen man'e cha'gipa aro mande ra'ako man'begipa saksa mande ong'achim. Nokma aro kangalni jatchio donggipa dewalini gimin Pritina aro angni nangrimani chol ong'na amjaha. Doctor, engineer, Ph. D aro barrister pass ka'giparangkosa Pritinana chawari ra'na am'aha uni pagipa. Degree gnanggipa manderang baksa an'tangko tosusae, Pritinako man'na sikaniba angnade jararangni kamsa ine an'tangkon chanchiaman'aha. Pritina angni gisikni kattarangko ma'sijaha. U'igija dake ua angming Shakespear-ni Romeo-Juliet gitasan ong'na chanchiaiaha. 'Nang - na agre angade darangna ka'sana man'jawa, na'a angko jeba dakbo' ine inaha. Salsao ua angni jak samgniko rimtate, 'hai an'ching bachiba re'gnok, darangba am'e man'jana gita dakgipa biapchi katgnok, sripna hai tu'begipa ka'san' wario' ine angko mong'achim.

Anga Pritinani ka'sanenggipa aro rinokgipa mikron samgnini mikchi jingjang jingjang ong'ako nie dongaiaha. Una angaba namen ka'saachim. Indiba anga Pritinako sriksrik rime katna man'jaha, angko manderang ka'pong ingen ine gisiko chanchiaan ang' gisikko amaiaha. Nangode sakntan pagipani mikkangona re'ange ching' sakgnini mangsongako paraksranggen, indiba anga Pritinako sriksrikde rime katjawa ine gisiktangko rakate donzaiaha. Saksa papgr bi'sani grapa gita ua grapaha. Anga uko angni ka'bakona jaksamgnichi gipake, grapnabe Pritina, grapnabe, anga jakoba chakchikna man'a, indiba nangni mikron mikchiko anga chakchikna man'ja, ine anga inaha. Ia angni gualani aro gisikni amgijani ong'achim.

'Babade angna mande tik ka'ahajok. Jechakomangba angni kattakode gamchaten ra'ja aro sing'gijade mamin'-chin ong'katna on'jaengaha da'ode, angna na'a maiko dakgen?' ine ku'rang til'tile Pritina a'zanaha.

Biako champengna man'a gita chinga sakgnian chanchie niaha aro jegitaba champengna man'jaode uni walon iechiba katgen ine tik ka'e donaha. 'Knal an'ching katbe-begenkonba mo? ong'jaode angade bisi ringe sigen' ine ua inaha. 'Na'a jajrengnabe Pritina' ine anga uni peo ku'-dimataha. Ua kusi ong'e nokchi re'angaha. Biana salsa skang, sakgni tik ka'e donggipa biapo Pritina angna walo sengsoachim. Anga ua biapona re'angjaha. Anga re'angnade sikachim, indiba, ka'dongjaha. Nokona re'bae anga tugrange dongaiaha, indiba anga wal'gimik mikgil sikja-ha. Anga maina sakgni tik ka'e dongipa diapona re'angjaha, ma'siama? Uni walo anga angni gisikni chanchiachi ja'kora-jakkora ong'ratako man'aha. Anga gisiktango chahchiaha, anga Pritinako rime bachi katgen? Maiko cha'dilgen? Maidake janggi tangna man'gen? Chinga sakgni cha'gija ringgija ran'krape sina nanggen. Anga cha'gija sinaba man'gen, indiba, Pritinako ang baksa maina siatgen? Maina, angni jako maming chakkorian dongja, angni maming kamaian dongja, Iarang ma'marikit gisiko chanchia nakatani gimin re'angjaha. Anga Pritinako togi-ha. Ua angna badita mikchak mikchak dake sengsoeng-genchim' ine agane ua ruutkale jrip dongaiaha. Kelki gita a'palchiko niate ua gisik sukbeja gita dongaha.

: 'Uni ja'man?' ine Gojen sing'attaiaha.

: Pritina siaha. Ua angko ruute sengsoe niksojaenba uni walon bis' ringe siaha. Pritinani siani ja'man anga

mamingkon dakna sikjaha. A'gilsakkon bangbang daknikman'pilaha. An'tang jangginan mitchipilaha, indiba anga sina sikjaha. Pangnan angni gisiko Pritinani mikkang bimangsan nakataiaha. Uko anga dikkidsanaba gualna man'jaha.

Salsao anga attamchirak chingni asongronge golpogipa biapo re'ange ua batangoimin salran'ni gimin chanchie dongengachim. Ua Pritinani namnikbatgipa biapchim. Wal andalsimsim dakaha. Town-ni street light rang ching'tokaha. Bolbijak gisepranggita light-ni teng'arang tang'angpilene'aha. An'a chingni asongrongripa bol kokkimao asonge dongengachim. Uno Pritina re'baaha. Anga uko nike jagokagita dakpilaha. Be'en gimik an'tesreng ong'pilaha. Skang asongrongagitan Pritina angni sambao re'bae asong'eaha. Angni be'en gramchipilaha. Gisiko kensike an'a sing'aha 'na'ara sawa ?

: Anga | anga nang'ni Pritina ine ua ka'dingaha.

: Nang'na maiko nanga' ine anga uko sing'aha. Pritina ka'dingtaie' na'ara ma'siama ma'sikujama, angade bisi ringaha' ine ua angna aganaha.

: Anga maiko dakgen ? angni dos-ara mai ?' ine anga Pritinao sing'aha.

: Dos | darangniba dos dongja. Na'aba bisiko ringbo. Na'a ang'na bakbak re'babo, re'babone, anga iano saksan brangenjok' ine Pritina an'tangtang andalao gimaangaiaha. Pagilaranggita dake anga nokona ta'rakprete re'baaha aro neng'bee palango tugrange dong aha.

Gitikgitak saoba re'bae angni be'en ning'o lekkani packet ge'sako sikata gita daknikman'aha. Anga chakate asong'aha. Lekkani packetko nike anga aiao inmanaha. An'tangtang angni jak samgni ua lekkani packet-ona

sokangaiaha. Uko anga kuliaha. Kulian baksa anga an'jrim dake til'tilna a'bachengaha. Uara bisisachim. Kene anga mikchipaiaha. Uni ja'man an'tangtang angni jak ku'sik ning'chi sikatman'aiaha ua lekkao dong-gipako

Ku'chi minokenba, Dingrin aro Gojen, 'uni ja'man mai on?'jok ?' ine uo sing'aha.

Gisikko jriate ua mande ka'dingsmite, ' bisi ringani ja'man mandeni je ong'na nanga uan ong'aha, ine aganaha.

: 'Uni ortode, na'a siaha?' ine Gojen jajrenga gnanng sing'aha.

Bik dake ua mande asongaoni chakataha aro pil'tai asongtaiaha. Mikka jimbena am'agita andalgripaha. Andal ki'it ki'it a'palchiko niate, 'angade angni station-o sokaha. Re'gnokne, bye-bye' ine relni ta'rake re'mitingon kelkigita ong'katangaiaha aro walni andalan baksa ua mande gimangaliaha Dingrin aro Gojen, jarachange nirikai-aha.

RASONG KOPAL

Sani rasong kopalo maiko see donsoa uko darangba ma'sina amja. Man'e cha'gipaba somoini kri kangal ong'aia aro kangalba rasongni kri man'e cha'angaia. Ia a'gil-sako darangba pangnajolnade man'e chakamaija aro kangalba pangnade kangal ong'e dongkamaija. Rasong kopalo changsade dingtangani sokbatelaia. Sal somoirang dingtangbaaia. Rasong kopalko darangba jakkipe ba chip-change jringjrotna rakkina man'ja ba amja. Uni giminan rasong kopalko ong'atgipa aro ra'ron'gipa saoba saksa Nokgipa donga ine bebera'na nangao ga'akaia. Bang bantan rasong kopalko bebera'a aro mitamrang ra'ja. Bebera'gipa aro bebera'gijagipa darangan rasong kopalni gimin name talede sakkignang aganna man'ja. Sal somoi nam-mitingode manderang Isolkon gualaiagita, rasong kopalni giminba manderang uagitan jechakaia. Duk sintia jajreng-arango ga'akosan mande Isolko ma'ringarita, maiba a'sel-rang aro chaktogija dukni sinjetarang an'tangona sokosan ua rasong kopalo indaken sea dongsoakon ine kalima aro ku'rachaka. Saobarangde a'selo ra'akachi, ong'iaoba a'sel ong'gnioni jokatako ba naljokataniko man'anichi rasong kopalo bebera'na draatako man'a.

Napoleon saksa rasong kopalko ba 'Fate' and 'Fortune' ko bebera'gijagipachim. Changsao saksa 'Pa'mist' (jakpa nigipa) uni jakpako nienba, 'na'a saksa ka'dong-gipa mande, ding'do ding'do kattarangko aganna chang-gipa, nang'ni kattarangko bang'an manigen aro bang'an manijawa, adita cheani jang'kiko dolaanani ja'man na'a

an'tang dontongjaode, na'a dontong draatako man'gen, maina, nang'ni rasongni lain (fate line) kan'dika ine a'gan-achim. Unon Napoleon uni kattana kusi ong'jae, an'tangni rasongni lainko (fate line) chakkuchi ratsrie, "I am the Master of my fate" angan angni rasongniba skoton? inachim. Indaken ua Italy, Austria, Egypt, Syria, Prussia, Portugal, Spain aro bang'a Europeni a'songrangko amaha, Ia amaniko chu'ongrik'jae ua a'gikakko amanikosa jumang nikna a'bachengaha. Unon ama man'kugijagipa a'songrang kenchake aro simsaksoe tom'dakaha. Uamang ku'cholsan ong'e Napoleonna sipairangming dakgrikna krenge dongsoaiaha. An'tang sipairangko rime Napoleon Germany-ona re'dilangaha. Uni mangsonganiara, Germanrangkoba ua uni ning'o ra'bana sikachim. Indiba ua Russia, Prussia, Austria aro Germany-ni sipairangni tom'dake ku'cholsan ku'monge dongsoako chagrongeaha. LEIPSIC minggipa biapo dolgnian pil'tak pil'tak dakgrikbeaha. Napoleon bang'a sipairangko ia dakgrikao gimaatna nangaha. Germany-rang ia dakgrikaniko 'THE BATTLE OF THE NATIONS' ine mingaha (Oct. 16-18, 1813). Bang'gija sipairangko rime Napoleon jenetenesa Rhine chibimani rikamjoljol katbae France a'songona sokeaha. Germany-oni katbaengon Napoleon indine inbaachim "I shall be back in May with 250,000 men". Indiba uni bobilrang uko May jaona sengsojaha. 1813 bilsini December jaon bobilrangni ku'cholsan tom'dake donggipa sipairang France-o nape dakgrikna a'bachengaha. Amjae Napoleon bobilrangni jako 'surrender' ka'aha. Uko St. Elba chichangona watataha. Ja chikking St. Elba chichango dongani ja'man ua salsao srik France a'songona

katbapilaha aro uni sinairangko tom'dakatna a'bacheng-aha. Napoleonni St. Elbaoni katbapilako knae uni bobil a.songrang Vienna son'jirmao ku'mengna tom'dakaha. Ua a'songrang England, Portugal, Belgium, Germany aro Prussia a'songrangchim. Uaman? Napoleonko "this disturber of the peace of Europe" ine minge ku'monge dakgrikna nisengsoaha. Brussel-ni mail chigni chelao donggipa 'WATERLOO' min'gipa biapo June jani 18 tarik 1815 bilsio bobilrangchi, Napoleon, ong'sipile amcherako man'aha. Chegipa a'songrang uko St. Helena chichangona watatdraaha. Unosa ua indine chanchina a'bachengaha, 'He is the child of the Fate' ba 'ua rason? kopalni jakoni bi'sasan ong'a. 'The man of destiny' ba' Rasong kopalni gita re'gipa mandesan ong'a Darangni nik'ijao donggipa bilsa a'gilsakni manderangko dal'a-chona, ona-chua, nama-namja, nokma-nokkol, raja-proja ong'atenga. Ua bil'ni nalsao darangba mamingkon dakna amja. Ua bilko ia a'gilsako saobarang 'Rasong-kopal' ba Isolni bil ine agan-ronga, 'Fate' and 'Fortune' ba rasong kopal Isolni Jakra aro Jakasigita ong'a. Bon-kamao, Napoleon St. Helena chichango bilsa dokna kingking a'songtangna aro ma'manti chanchiarango ga'ake gisiko namen skimaangaha aro uni ja'man ua oko 'cancer' saako man'e unon siangaha.

William Shakespeareba indine agana 'what fates impose, that men must needs abide'-Rasong kopal jeko on'draa, ukon manderan? manie ra'na nangchongmotaia (Henry IV (3rd part), Act 4, Sc 3) aro 'and let no man take care for himself, for all is but fortune'-darang maddean an'tangna samsakna nangja, maina, iarang gimikan rasong kopalni kamsan ong'a (Tempest, Act 5, Sc 1). Shakespeare indakeba aganangkua, 'Our wills and fates do so contrary run, that

our devices still are over thrown, Our thoughts are ours, their ends none of our own (Hamlet, Act 3, Sc 2). An'chingni sikanirang aro rasong kopalang apsan re'rongja, an'chingni chanchia gitade ong'rongja, chanchiarangde an'chingnin ong'a, uko chu'sokatanide an'chingni darangnian ong'ja. Rasong kopalan mitino donggipa Isolni bil ong'na nanga. Mande an'tangni sikachi jekoba dakna man'aba don'a, indiba rasong kopal un baksa dongpajaode ba bakrimpa jaode ua mamingon chu'sokna amja. Rasong kopal baksa man'eni sikaniba apsan ong'ode, ua mande chu'sokgipa.rasong gnanggipa aro a'gilsakni kragipa depante ong'e janggi tangna ama.

1966 bilsio anga middle skulo poraimitingchim. Christmas chutti ong'ani gimin chingni 'madam' saksa songiang Gola-hat-ona re'angengachim. Ua salsa skang Bongaigaonona re'ange mandetangni noko dongsoengachim. Bini bedding aro trunk-bakos-rangkode salgipin pring sni bajina skang Bongaigaon rel station-ona sokatchina gita angko aro angni ripeng sakgitamko agane donangachim. Chinga jegita jotton ka'eba somoigita rel station-ona sokatna man'jaha. Khagarpur-oni bus-o gaange Bongaigaon bus stationoni rel station-ona bedding aro bakos-rangko chilangmitingon rel gari re'angsoaiaha. Chingko niksoarian chingni madam ka'onangbee jebaisi, jara, burbok, idiot inerang manengsoaha. Chingni aganchakanirangkoba mamingkon knachakjaha. Aditani ja'man 'chilbo bakos-rangko' ine re'angaiaha. Chingaba bedding aro bakos-rangko chile madamni ki'sang ki'sang ja'rikangaha aro ua madamni bosturangko uni mandetangni noko donbaiaha. 'Madam chinga re'gnok' inomangba madam

chingming kattaan agenjaha. Dosi gnanggipa manderang gita dake chinga gisiko duk man'bee hostelona re'bapilaiaha. Chingaba darangan gisikode sukjaha. Indiba, chingaba mai dakbochim. Amadipetde ta'raken bosturangko ra'ang-achim, indiba, rel gariko sraprikjaha. Chanchie walgimik mikgil sikjaha.

Salgipino pring chet bajimango madam 'Embassador' gariko ra'e chingni donggipa hostelona re'bae chingko 'bao amika askimang' ine okameaha. Okamako knae chingade, manengtainasa re'baakon ine kenbee madamni mikkangona re'baaha. Indiba madam c'a'asalde namen kusi. Ua chingni bimingrangko minge indine inaha, 'na'simang angko kema ka'bo, maina, mejalo anga na'simangko sikatang ka'onange ong'arek ong'jarek dake manengman'aha. Na'simang kobor man'jok ? Mejalo angni gaanggni-gipa rel gari 'Rangia Junction'-o accident ong'aha aro uno gaanggipa sak sotchebri manderang siahana. Angni ticketko ra'e je mande re'angengachin, uaba siahana. Isolsa na'simangni jakchi, angni bedding-bakosrangko rel station-o tik somoi gita sokatanggiachi, angni janggiko aro angni demechikni janggiko jokataha. Ong'jaode chingade maningsan signokchim. Angni a'gilsako janggi tangkuani rasong kopal dongkuengakon. Isol na'simangni jakchi jokataha. Uni gimin, hai an'ching da'o dikdiksa ua rel gario accident ong'e sigiparangni janggina aro jerangni janggiko bilakgipa Isol jokataha, uarang gimikna Isolko mittele bi'na' ine madam Isolo bi'aha. Isolo bi'manani ja'man, chingni janggilo ka'sae doktope aro mejalo chingko gualo manengman'ani gimin kema bi'taie 'Embassador' gario gae re'angaiaha.

BON·CHOTATAHA

Poraiarang matchotani ja'man maming chakkori ka-jaode ba kam am'eba man'jaode ua skia pora man'gipa mandeni gisik mai rokom ong'a uko unemployed ong'e donggipa manderangna agre uamangni dukko aro gisiko dongsiksakaniko darangba ma'sina amja. Poraia ma'chotarian kam man'aiode skia man'gipa manderangni unemployed ong'e dongmitingo uaman'ni gisikni saknako ma'sina man'ja. A'songo skia pora man'gipa chadamberang bang'engjok aro mittamde Government office rango kam am'e nioba kam man'jae indinarin kamgri dongna nangengjok. Chu'onga gita a'songo industry aro 'job orientation scheme'-rang dongjani gimin a'songni skia pora man'gipa ba gnanggipa chadamberangni gisik 'devil's workshop' ong'engaha. Maiko dakgen chanchie nibo, duk chake, kosto man'e skia pora matchota ja'manba maming kamkon man'jaode, kamgri indinari rorame dongna nangode, unbaksanaba ma'ni paani obostaba namjaode, nogipa jonggiparang bang'ode, ua mandeni sko taning tik ong'-jawa, ua maibarangkosa dake rona sikaigen. Poraia matchotahaode darang ma'gipa pagiparangan bi'satang bakbak maiba kamrangko man'galgalchina ine gisiko chanchironga. Nogipa, jonggipa, gritang aro namchiktangrangba mama-dada chakkori man'jokode chingkoba niatpa'gen aro alamala kolomna pencilna dakchakpagen ine ka'dongsoa. Indiba chakkori ba kamkon man'chengjaode ua mandeni gisik mai rokom ong'gen chanchiate nibo. Ua ma'gipa-pagipa, nogipa-jonggipa, gritang-namchiktang, songsul-noksul aro ripengskarangna mikang pa'na kratcha-

gen. Maina, uni maming kamaian don'ja. Bida g'ngangipa mande ong'e kangri aro jepo paisa pelsaba donggija dake rorame dongnaba ripengska bajugandaranko grongnaba namen kratcha'ani ong'a. Chong'motan, skia pora g'ngangipa manderang kangri dake dongna nangode, uamangni jak-ja'ako pe'tonge dona gita daknikman'a.

Ringmanni obostaba apsan. Ua B.S.c pass ka'aha, kam am'e roa bilsibongarang ong'pilengjok indiba kamkon man'kujaenga. Ua achak kore chagiparang gita ong'pilengaha. Ringmanna mikchaenggipa nomil Dimrede bia ka'narara pechal ka'engjok. Ringmanba Dimrena ka'aa, indiba ua jako chonna rema chakkori ba kamko man'chengnasa skenga. Jako kam don'jaode, jepoba paisa pelsan dongjaode, o'bite-niotangni alduamangmangko cha'ari dongnade darangan kratcha'gen danang | Uni giimansa Ringman chakkori man'chengna sikbeen'achim. Da'ororode chakkori man'naba kopal-rasongni katua ong'a. Ong'jaoba, an'tangni mama-adarangni gisepo MDC, MLA ba minister ong'giparang dongode unode kattaan dingtang ong'genchim. Indiba Ringmaniara darangba dongja, uan una dal'a problem.

'Atcha, minut-sao badita second donga ?' ine Dimre Ringmano sing'aha. 'Second sotdok' ine Ringman Dimrena aganaha. 'Second sotdok ?' Anga second-sakon sengnap jaengaha Ringman, hai an'ching biagalgalgnok' ine Dimre aganaha. Minut-saon second sotdok ong'ode, konta-sao badita minut, Salsao badita konta, jasao badita sal aro bilsisao badita jaarang, aio, angade indita second, minut, konta, sal, ja aro bilsirangko maidake senggnok | ine Dimre rang'spea g'ngang aganaha.

Ringmanni ma'gipa pagipa uni chonon siaha. Ua abigipamangni noko dongesa poraiaha. Changsao Dimreni mama-adagiparang Ringmanko chawari sing'na ine Ringmanni abigipani nokona re'baachim. "Ringmanni paisa pelsaba kamai dongja, uko angade bia ka'e on'na man'ja-wa" ine rake abigipa aganataiaha.

Salrang jaarang aro bilsirang batangengaha. Indiba Ringman chona rema ge'sa chakkorikoba man'kujaenga. Uchi Dimreni gisikba dingtangengaha. Ua Ringmanko nikjokon da'ode gelna jotton ka'engaha. Gindangminga da'ororode Dimre jechiba re'angrongengaha. Apsan cinema nina re'angrangkoba Ringman baditada chang grongengaha. Chakkori man'jani duk aro Dimreni una pengreng pengcheng dake Gindang baksa rorame mesokarangni gimin ka'tongo namen duk man'engaha Ringmande. 'Maiko cha'e poraie B.Sc pass ka'jok, da'omangba chakkori ge'saba man'e ra'na man'ja ine abigipa salantian pa'sike manengna a'bachengaha. Jrip chakchikana agre Ringman maming cholkon nikjaha. B.Sc pass ka'eba chakkorikon man'jani gimin a'gilsako janggitanganikon ua namen andalbee nikaha aro certificates, mark sheet-rangko chit-priprae galna gitik dakmanpilaha. 'Minut-sao badita second donga' ine Dimre Ringmano salantian sing'rongachim. Una secondsaba sengnapgijagipa me'chik da'al Ringmanni mikkangon gipin me'asaming ka'ding an'senge mesokengjok. Ua duk man'bee indake chanchie gisikko rakataha. Je mandeba Dimreni sing'ronggipa 'Minutsao badita second donga' ine sing'ode darangnaba ua chasongoba aganjawa. Iako sing'gipa manderangko ua togigipa aro choletgipa inesa ka'tongo ra'aha. Dimrean uni example. Dimreni bewalna ua ka'rekpile mitchiaha.

Post Office-ni peon saksa re'bae Ringmanna 'INTERVIEW'-ni 'call letter-ko on'eaha. INTERVIEW-ni 'call letter-ko man'e ua namen kusi ong'aha. Tarik gitan ua ready ong'e 'interview' on'na Shillongona re'angaha. Bimingo okamata bakan Ringman 'interview' ra'engipa kuturiona napangaha. Uno sakbri interview ra'gipa officer-rang asonge dongsoengachim. Ua officer-rangko 'Good afternoon sir' ine salam ka'tokaha.

:Asongbo-ine ge'etani gimin Ringman chairko an'tangchi-pak sale asongaha.

: Nang'ni biming mai ?

: Ringman Sangma-ine ua aganchakaha.

: Qualification ?

: B.Sc - ine ua uni certificates aro mark sheet-rangko nichina on'ataha.

: Atcha, 'minut-sao badita second donga ?' inc uko sing-taiaha.

Ringman Dimreni sing'ronggipa ong'ani gimin ia sing'aniko chakkori man'jaode man'jakal indiba ia sing'anikode aganchakjawa ine gisikko rakate irip don'a'aha. Dimreni sing'ronggipa apsan sing'ani ong'ani gimin Ringman aiao inmanaha aro Dimreni uko chonniike roarangko gisik ra'e namen duk man'aha aro ka'tongo mitchia nakataha.

Aditani ja'man Ringmanko 'na'a da'o re'angna man'a' ine aganaha. Ringman an'tangni certificate aro mark sheet-rangko ra'pile interview ra'enggipa kuturioni ong-kathaiaha. Ua gisik sukjaha. Uni kopai-rasongode haida chakkorikon sea dongjakon ine ua ohanchina a'bachenga-

ha. Chakkori man'chipjaode, man'chingjaan dongna nangaiode uni obosta mai ong'en. Ia ma'manti katarangko chanchie ua nokchina ine Tura night bus-o gaba-iaha.

Pring sni bajimango nokona sokeaha. Ringman noko soke neng'takkujaengachim, unon abigipani bi'sa chonbatgipa, Ringmanni gritang chonbatgipa, jean ia bils klass 1(one)-o poraengachim, ua re'bagalgale 'mama, mejal chingni porika ong'achimba, mingsakode angade aganchaknan man'jajok, na'an ukode angna skiatjajokana' ine mamagipa Ringmanni sambachi re'ange aganeaha. Uni ja-man ua bi'sa mamagipaming rentae donge 'Minutsao badi-ta second donga?' -ha mama ine changnichang sing'na a'bachengaha aro inaha, iakon ua mejalni porikao aganchakna man'jaha. Gritanggipani changnichang sing'e dong-mitingon, Ringman mamingko aganchakgija sambao dong-enggipa tebil koriko jako ra'e nko kulie uni second kata-ko aktete gritanggipani jako on'aha aro darangba knajana gita dake ku'aningchi 'minut'-sanide maming second dongja ine agane BON·CHOTATAHA.

MIRIM RONGPRAKNI GAMCHATA

Badiaba kattarangkode gisik ka'tongchisan ma'sina man'aia, uko ku'sikchide parakna man'ja. Angni gisik ka'tongo nangdikeaniko haida knaso'iparangna kragipa kattachi ba ku'sikchi parakna amjawakon. Indiba angni chagronggipa nangdikeaniko ma'sipachina ine amadi'et iano parakna jotton ka'aha.

Kattade darangni nokdangnan nan'chon'motgipa kat-ta ong'a. Noko chakkol ba cha'parikgipako rakkiani bil dongja, indiba chakkol ba cha'parikgipako rakkijaode nokdangan cholija. Cha'parikgipa ong'jaoba betonna chakkol rakkigen ine mande am'eba man'jaha. Mande am'e man'jae neng'pilaha, gisikba decto ong'pilaha. "Chakkol rakkienba an'tang babugiri dake rorame dong-na skaniko galbo" ine an'tang jikgipakoba maneng'pilaha. "Nangode mi bijak song'aoni, me'dik samdikrangkeba angan nataigen, su'sranzaigen, indiba mande am'e songjol nokjol angade re'winina man'jawaha."

Unon angni jikgipa, Dilne ka'onanga gnang indine inaha. "Rani Mary maiko inachim uko gisik ra'jama? Manderangni cha'na merong dongjaode, uamang maina 'cake'-ko ra'e cha'ja? Angaba indaken ingen komia beton-na chakkol man'jaode, dam rakanikoba ra'na nanggen. Nangode mikon pattisarang cha'gija donggen, indiba chakkol ba kam ka'gipa dongjaode cholijawa."

Dilneni kattarangni kosakode mamingkon aganani dongjaha ine anga namen ma'sia. Almario dakmandarang gape dongoba noksulni saoba dingtang 'design'-ni dak-

manda ganako nikode ukoba ra'pana ba brepana skani jegita me'chikrangna nangchongmota, chakkol saksamangkoba ang' mandena indaken nangchongmota. Ia nangani-ko am'e on'jaode mai ong'gen, uko chakchikani aro ka-dongani bil ango dongja. Uni gimin saksa chakkol jeonikoba am'e on'nan nambatgen. Gimaagipa bi'sako am'achacha gita anga chakkol ba cha'parikgipako am'e songadamrangonaba sokangaha.

Rasong gri ong'ode a'gilsak gimik am'eba mamingkon man'ja, indiba Isolni ska ong'ode uko noktangon man aia. Angni chakkol man'nanioba indaken ong'aha. Baditaba jarang chakkol am'e man'jae anga jadasipile duk ong'e salsa barandao asonge dongmitingo saksa bi sa re'bae—"babu, chakkol rakkigenma ? ine sing'eaha.

A'bachengode anga nachiltangkon bebera'na man'ja-ha. Adita somoinade anga ua bi'sakosa nitate dongman-aiaha. Angchiko nienba bi'sa angko nagok (nachil kna-gija) inesa chanchiakon. On'tisa rakkale chrike, "babu, chakkol rakkigenma ? " ine sing'taiaha.

Jadasike dongaoni mikrake anga "chakkol ? ? ? Na'a chakkol donggen ? Re'ba indide, nokona napbabo. Haiwa murao asongbo. Na'a angni noko chakkol donggen ? De indide, dongbo. Da'asalni dipetan na'a kam ka'bo. De, de....." Anga kusi ong'e aganaha.

Dilneba do'gacholon chadenge dongachim, indiba uko anga nikjachim. Ua ka'onanga gnanng indake inaha" sing'chenggija am'chenggija je bi'sakoba chakkol rakki-aiama baoni bi'sa, sani bi'sa, dormoha badita ra'gen, larangko sing'jokma ? Sing'gija am'ohenggijaan bi'satangko gitasa alduaina am'engama ?"

Indake sing'anina anga aganchakna man'jaha. Indiba chakkol rakkiode dormoha badita ra'gen iarangkode sing'-na nangachim, indiba angade gualsrangaha. Ua jadisa angni beton man'ana bate aganode angan bikpil gipinni noko chakkol dongskaia nanggen.

Ang' mande on'tisa rakkala kattachi ua bi'sako sing'-aha.

: Ei bi'sa, nang'ni bimingko mai minga ?

: Kokchengra. Bi'sa skoko denggoke aganchakaha.

: Kokchengra ? maidakgipa knadika bimingsai. Ei bi'sa, ang'ni noko dongode ia knadika bimingchi cholijawa. Nang'ni biming ong'gen 'Kojin,' u'ijok ? Ei, nang'ni nok bano. ?

: Nok ? Angnide noka dongja.

: Nok dongja, iara mai katta ? Ei, kakketko aganbo, nang'ni nok banomancha ?

Kakketko agana gitan ua bi'sa da'oba changsatai uni nok dongja inean agantaiaha.

Bebera'na man'jaoba, haida nokgri jangri dake donggipa bi'sarangba ong'naba donga ine chanchie "Ei nang'ni sawa sawarang donga" ine sing'taiaha.

Skaag agana gitan an'san dake ua bi'sa "angni darangba dongja ine agantaiaha.

Dilne ia changode haida adita bebera'na man'aha, maina ia bi'sani noka ja'man dongjaode darangba dongjanaan kraa. Bon'kamgipa sing'aniko ia bi'sao sing'aha. "Nang'na dormoha japraiko maidake on'gen."

: Na'bi'mang angni kam ka'ako nie nika jeko on'gen uan ong'aigen. Anga betonni gamin mamingko aganna sikja. Na'bi'mangni kusi ong'e on'ako ra'aigen. Bi'sa aganchakaha.

Bi'sani indake aganchakako knae chingade namen ra-song gnaanggipa ine chanchiman pilaha an'tangtangko. Indiba bi'sani indake agananio maiba donn'gipa miksong-ani dongama dongjasai ine srik srik chinga nitatgrike sing'rika gita dakaha.

"De, indide da'asalonin kam ka'bo. Indiba nang'ni kamko anga porika ka'e nikugen. Namnikode rakki-gen, namnikjaode, maiba ong'gija dakarangko nikode dok-srange rikgalgen aro paisa pelsaba on'jawa. De, kam ka'e-bo. Indiba nang'ni kamko porika ka'chenggen."

Angni jasamang porika ka'o ia bi'sa pass ka'aha. Nokni gitcam chakkol gitan jekoba namen dakna changaha. Angade gisiko namen kusi ong'aha aro Dilneni dikdar ka'arangoni jokaha ine chanchiman'aha.

Indiba, angni kusi' salgisako bakan aram simdapa-ha. Jadokan ong'srangkujaenga, unon Dilne changsao namen dongtogija gita dake ka'onange "na'ade nokdang-ni gimin on'tisaba gisik on'na sikjahama" ine inaha. Dilne baksa bang'a katta aganna anga ka'dongjaha. Anga kan'dikesan sing'aiaha-

: Mai ong'jok ?

: Kojinko rakkina man'jawaha. Na'a dingtang bi'sa-ko am'galga'bo. Knae jagoka gita anga "mai dakjok Koji-nara" ine sing'aha ?

: Mai dakgen, chakkolrang jeko dakronga uakon dakenga, cha'una a'bachengengaha.

: Cha'uenga ? Ua maiko cha'uaha ?

: Nangna agankujaengachim. Baditaba sal'rangonin ua chona chona bosturangko ge'na ge'sa dake cha'ueng-

aha. Salsao ruti donꝓjaha, salgipino me'chik bi'sani cholaba dongjaha aro uni jaman angni blouse ge'saba dongjaha. Indiba, bang'a kattarangko chanchiesa anga nikeba nikgija gita dakmike dongengachim.

: Indiba, ia bi'sanide nok jam, ma'gipa, pagipa, noabi, jongada darangba dongja, ua bosturangko cha'uangse sana on'gen, maiko dakgen ? An'tangde ua jakkalna man'jawa.

: Uanba aiao inmanani. Mejalonin angni gital brebagipa chadorba dongjaha. Srik srik re'ange uni balis mitaponikosa chadorko nikbaaha. Dilne aganaha.

: Mitam bosturangara ? ine anga sing'aha.

: Chadorkosan nikbaiaha. Ia bi'sa uni darangba donꝓja inachim, indiba anga da'o bebra'na manjaengaha. Ia bosturangko ra'ange haida ua saobanasa on'nenananga.

: Ua saobaan uni ma'gipa pagipa ong'jaoba, uni ka'samikchagipa ong'naba donga. Anga aganaha.

: Dilne ka'onanga gnang "pilak kattarangkon na'ade bal'eknasa am'aia. Me'dik cha'ugipaan jamande rongdik cha'ugipa ong'naba bang'a rakja. Uni gimin somoi nammitingon uko rikgalatna nanga. Jamande namsrangjanaba donga. Dilne aganaha.

: Kojinni gimin angni gisikoba chanchiani nakataha. Rutikode ua okkriana cha'ue chanaba donga. Blouse-ko haida uni ka'sagipana on'naha. Indiba angni bi'sani cholako ? Angni bi'sade bilsa bongasan ong'aipiti. Kojinni darangba dongjaode, ia bi'sani cholako sana cha'ujok ? Saobarang dongode maina tol'e aganjok ? Haida Kojinni janggi tanganio maiba rohoso (mystery) dongna nangchongmota ine chanchie anga uni daka rikanirangko jarikna gisiko tik ka'aha.

Walsa baro bajimango anga su'buna chakatachim. Unon anga Kojinni tusigipa kuturini do'gako bangbang dake nikaha. Uaba su'bunarang ong'katengnaba donga ine chanchie adita senga gita dake dongmitingon Kojinko barini cholgugako oe Salgrochipak ong'kate re'angako nikna man'aha. Angaba ja'ani jutako noko oke done uko ja'rikangpaaha. Ua somoio Jajong nakujaengachim. Sao-ba ja'rikenga ine ui'jana gita dake adita chel'kale anga re'na jotton ka'aha. Kojinni jako maibako katepe ra'gipa chona topola dongachim. Ua maiko cha'uaha uko ui'na skana bate, ua cha'ugipa bosturangko bano sana on'nenga ukosa ui'na sikbataha. Uni janggi tangani rohosu (mystery) kosa anga ui'na sikbataha.

Buringrara gitasa ua re'angengachim. Matchu ramana agre uno rama manchade dongjachim aro rongtaljachim. Kojinko anga cha'u ine chanchijachim. Indiba da'alde ua cha'u ong'ja ine jechakna man'jawaha. Nokni badita chel'e re'angahachim ukon angade ui'piljaha. Anga aro Kojinna agre ua buringo uni walo haida darang mandeba dongjachim. Anga tarakkale uko srapna jotton ka'aha. Buringo banoba napchipjokode jamande sandien man'jawaha. Angni tarake ja'rikengako ma'sie Kojinba tarake katna jotton ka'engon ua bolritchongo ja'gitote ga'akaha. Unon anga Kojinni sambaona sokangjolaha. Uni sambao chadenge anga "chakat, bakbak chakatbo" ine rake inaha. Achakrangni noggipani mikkango ki'me laklake ku'sikko kosakchi de'doe kenbea gnang daka gita Kojinba dakaha. Me'chikni bimang gipoka, silbea mikkang aro walo balgipa pulrangna agreba a'gilsako walo niani bosturang bang'bea ine uni salosa gital dake anga ma'sina man'aha. Kojin

kenbea gnang be'en til'tile ka'sne chadengaha. Uni mik-
kangko nike anga namen aiao inmanaha.

Uni jako ba'rachi katepgipa topolakosa anga mai-
mancha uo donga ine nina sikbeaha. Bakbakan ua katep-
gipa topolako jak samgnichi chelo rim'kote donnuna
jotton ka'aha. Rim'a man'eba cha'ugipa bostuko kratcha-
gija dake donnuna jotton ka'ani gimin anga rang'san
gisiko ka'onangbaaha. Rang'san ua katepe dongipa topo-
lako anga uni jakoniko ra'seke ra'aha aro unon ua ka-
tepgipa topola ge'engsrirae a'o ga'akpripraaha- ua a'o
ga'akpripragiparang chador, blouse, chola, jakstem ba
rutirangba ong'jachim-uara batisa misachim.

Kojin batini mi a'o ga'akpripraani gimin changsa-
mangmang duk ong'e chrikaha.

Angaba ua batini mi ga'akpripraako nike gisiko ja-
dasikpilaha. Adita ruutkale ja'asike dongani ja'man anga
ka'sne sing'taiaha.

: Kojin na'ade aganachim nang'ni darangba dongia,
nokba jamba dongja, indide ia miko na'a sana ra'baenga-
chim ?

Angni sing'anina ua mamingko aganchakgija a'o ga'-
akgipa mirangkosa nitade dongaiaha.

Anga da'oba changsa intaiaha- "Kojin, na'a maming-
na kenabe, na'songni nokko angna mesokbo. Ga'ak gimin
mirangna na'a duk ong'nabe. Anga da' oan merong brena
palsa on'nanngen."

"Hai, indide," ine ua angko uno.donggipa samba bu-
ringona rimangaha.

Kojinming ja'rikangpae anga je nokko nikeaha, uko saoba paglarang nok inoba kema ka'na man'jawa. Bol cheksirangni kosako wa'jak pindapasan ong'aia aro moi-larara salja surirangchisa uko alamala wilwilate bera tarie donenga. Sambachi re'angon maibani seengako anga man'aha aro rang'sitna man'pilgija gita dakpilaha. Kojin aditani ja'man, "ai, o ai" ine ma'gipako okamataha-

Nokningoni saobani ku'rangko knana man'aha, uko mandeni ku'rang ine anga da'omangba bebera'na man'kujaenga. A'ningoni saobani ku'rang nakatbaenga gitasa knaiaha aro ua ku'rang indake sing'ataha-

"Kokchengra, na'a mi ra'bajokma ?"

Anga bang'a chakchikna man'jaha. Salja surirangko wenwene bera tarigipako anga rang'san salchrakataha. Unon jajong aditade chuahachim. Jajong teng'achi anga jeko nikaha, uko a'gilsakni bon'kamgipa mitchignigipa gita daknikman'aha. Pilak mikkang bimang aro jak ja'ani be'enrang soe ga'ake grengrara dakgipa konchi man'gipa me'chikma aro uni sambao saksa bilsa bongarangni me'chik bi'sa asonge dongengachim. Anga nikarian ja'gokaha aro gingtingko rim'tipe uanoni dang'dang chadengaha.

Kojinni mikkangchiko anga niatnan pa'jaha. Gipinchipakko niate anga Kojinko indake inaha "na'a iarangko angna maina aganjachim ?"

Kojin mamingko donnugija, ka'dongen indine aganchakaha-

: Iarangko ma'siode konchi man'gipa mandeni bi'sako sawa chakkol rakkigen ?

Angni maibako aganna am'mitingon Kojin ma'gipa

indake sing'attaiaha-

: Kokchengra, mi ra'bajokma ?

: Ra'baaha ai, ra'baaha, ine ma'gipana aganchake Kojin angko uanon saksan galangaha. On'tisani ja'man anga uko ja'rikange aro nike aiao inmanaha. Angni ka'tongo ning'-tubea saknaa su'tingeaha aro gisiko duk man'beaha. Anga mikrontangchi nikaha, ua a'o ga'akpripragipa mirimrangko rongprak prak ma'gipana kolna a'bachengaha.

KA·A, CHI·A, SIPAKA

Poldinni kragitade bilsu ong'aha. Indiba ua da'onaba jikan kimkujaenga. Bank-ni Branch Manager ong'aha ua da'ode. Iachi uachi transfer ong'jojoanan ua tom'tome kam ka'na man'jaengaha. Bang'bata somoion songadam-rangchisa Poldinde 'tour' ba songrena nangrongachim. Songadamni manderang game su'e cha'giparangna maidake Bank-oniko dakchakna man'gen uaranko Poldin sandie niroke kragita uamangna 'Loan' on'e dakchakrongengachim. Indaken ua cha bagan dakna, kesonat ge'na, do'o, wak jilanina manderangko didiengachim aro maidakode Governmentni loanko Bankni through man'a amgen uaranko skiengachim didiengachim. Songadamni manderangba Poldinko namen namniktokachim.

Poldinni da'onaba jikgipa kimgija dake dongani a'selara indakechim. Bilsu chikking skang uni college-o poraimitingo una saksa junior chatr chitti seachim. Ua chatrini chittiko man'e ua gisiko namen chanchiachim. Changsade a'gilsako tange dongode nokdang ba'ku dakna nanggen ine chanchie ua ua junior chatrina chitti sechakaha. Indiba uni poraina ska dipet poraiangchina ine agane donaha. Poldinde Government chakkoriko man'e beton man'ahaode basakoba basakoba uni ka'sagipana dakchak-atrongachim. Ua nomlni bimingko Dorina mingachim. Mitamrangde uko 'Dorin' inesan okamongachim. Adita bilsinade uamang chitti segrikarian ka'sagrikachim. Poldinni mangsonganiara Dorinni poraia matchotahaode uamang bia ka'e nokdang dakgen, lanchim uamang sakgnini

ku'monggrikani aro ku'mikchetgrikani.

Indiba da'ode jagni jagittamrang Dorinni chittiko man'sojae Poldin gisiko jajrengaha. Iana skangrangde antlon kingprak man'soachim. Indiba ia jagittamrang mai ong'aha Dorinni, maina kingsa chittiba seatjaha? Poldinni chittirangko ua man'soengama? Poldinni chittiko man'sojaoba Dorinde seatna nangachim, Poldinni gisiko rokomari chanchiarang nakataha. Ua da'ororo gisik sukaengachim.

Salgipino Poldin gisik sukaoba office-chi re'angaha. Uni gisepon Dorinni kingsa chittiko peon ra'bae donangaha. Ua chittio Dorin uni nok para ra'e dongengako janapatachim. Chittio indiba maming ka'saani, rinokani, gisikni ding'ani aro skanian dongjachim. A'ode a'angana man'a, ka'sagipana jegita chitti sena nanga ua gita ong'srangjachim. Gisiko jajrenga gnang Poldin, office-oni salgittamrang chutti ra'e Shillongona Dorinni para ra'e dongenggipa nokko am'angaha. Ua wal sku ata bajio Dorinni nok para dongenggipaona am'e sokangaha. Dorin noko dongsojachim. Nok maliksa Poldinko Dorin da'oa re'bagnok ine nokona rimange asongataha aro Dorin pangnan ua panteming roramronga, cinema nina re'angronga ine agansoaha. Ua panteba Dorin baksan cha'enga aro dongangenga ineba agansoaha. Poldin nok malikni kattako knae sko miksila gita dakangpilaha.

Aditani jaman beanbebe Dorinni saobaming ka'dinggrike re'baengako knana man'soaha. Nokgipa a'palona ong'katange Poldinni re'baako Dorinna aganeaha. Dorin nok nokgipani 'seating room'-ona napbae Poldinko rimangaha aro maming re'baagipa panteko "dada" ine Pol-

dinna agansoaha. Poldin Dorinni kuturiona napange asongkujaon, Dorin, "Chingade knal nokchi re'angna bus ticket ra'manaha, hai na'aba knalan chingming re'aibo," ine mong'aha. Poldin Dorinni kattako knae aiao inmanaha. Poldinni sokangana Dorin on'tisaba kusi ong'e mesokjaha. Changni chang "hai na'aba knalan re'aibo" inani gimin Poldin gisik saagita dake "na'song re'angna skode re'angaibo, indiba angale knalde re'angjawa" ine gisiko saa gnang inaha. Uni ja'manba Dorin ua panteni donggipa kuturichi changbrirang re'angkuaha aro na'tok songripako chu baksa kaji cha'china ine ua pantena ra'ange ruute dongbaaha. Ua pantekon Dorin chi ko'naba okamatachim. Poldin mamingkon ma'sina man'jaha, indiba uni gisiko ua somoio namen rakbegipa balminduri on'engachim. Poldin Dorin baksa wal'ni sal'ni dongraaha. Ua pantede salgipinon re'angahachim. Poldin gisiko chanchiaha, ua pante adagipa ong'ode maina gol'ona agangrikna changsaba re'baja ? Ja'man gipin ripengiangchi Dorin aro ua pante jikgipa segipa gitan apsan dongrim cha'rimaha ine ma'sina man'e Poldin gisiko namen mitchia nakataha. Ua Dorinko bebera'na man'jaha. Poldin gisiko namen duk man'beaha aro Dorinna mitchiaha. Indake ong'gen ine ua maming saloba chanchijachim.

Noktan'ona re'bae Poldin cha'a ringa gri dake dongna a'bachengaha. Bilsignirang ua Dorinni uni ka'saako chonikani gimin chu ringe pangan reke dongsimaiha. Ua pagla gita ong'angpilaha. Dorinani kamna darang knagiparangan Poldinna suk ong'chakjaha. Indaken Poldin gisiko duk man'bee sal somoirangko re'atengachim.

Uni ja'man Hejila minggipa, nomil saksa Poldinni janggio aro uni mata man'gipa ka'tongo rinokgipa molomko nongna re'baagita dake sokbaaha. Hejila saksa namen katta aganna changbegipa nomilchim. Poldinni ningtugipa ka'tongni noksiko nape Hejila rani ong'na man'achim. Hejilako man'e Poldin uni batanggimin salo Dorinachiko man'gipa dukrangko gualangpilaha. Hejila Poldinni mata man'gipa ka'tongo indake ka'sani molomko nongaha, Poldin Hejilana gisik ka'tong on'e namnikna aro ka'sana a'bachengaha. Hejila Poldinni jangziko aro gisikko namen dingtangataha. Hejilako man'e Poldin uni gitcam dukrangko gualna man'aha aro namen kusi ong'beaha.

Hejila saksa skia man'gipa nomil ong'a. Uni poraimitingonin ua baditaba T.V. serialrangkoba ka'aha. Silbean baksanaba uni rinoka kattarangsa uko silbatatachim. Pagipa ma'zipani nokdangba nanja:rangde ong'jachim. Shillongon ua B.A. kode pass ka'baaha. Poldin Hejilako janggin ripeng dakna tik ka'aha.

Poldin Hejilakon bia ka'aha. Bia ka'ani skanggipa walo an'pak kancha ra'mitingo Hejila "na'a angni skanggipa ka'tongni mande" ine Poldinna aganachim. Poldin mamingko inchakgija ka'dingsmite Hejilani peo ku'dimataha. Indake uamangni salrang adita jarangde batangaha. Poldin ma'gipa, pagipa aro nogiparangba Hejilako namniktokachim. O'bite, niotang aro nosarirangnaba Hejila ka'saachim. Uni giminan uamangde Hejila gita gisik gnanggipa, bewal namgipa aro o'bite, niotangna simsakgipa buwariko namchik dake rasong kopal namesa man'gakjok ine songsul noksulrangnaba aganrongachim. Poldin an'tangba namen kusichim. Uni ka'dongsoana bateba ua Hejila baksa

suk aro kusi ong'a ine ripengskarangnaba aganrongachim. Chongmotan, Hejila Poldinko namen kusi ong'atna chan'achim. Poldin Dorinani uko togia ba 'betray' ka'ako gisik ra'e Hejilakode namen kakketgipa aro una ka'sa-chongmotgipa ine ka'tongo ra'achim.

Changsao, Poldin ma'gipa, pagipa, nogipa aro jik-gipako rime, uni chakkori ka'enggipa biap, Shillongona rimangengachim. Shillongo ua Rynjah Colonyo nok ra'e dongen'achim. Maruti vanni mikkango Poldin aro jik-gipa, ki'sangni 'seat'-o ma'gipa pagipa aro nogipa. Ma'gipa, pagipa aro nogipa Shillongko nina skengachim ine aganron'ani gimin, Poldin uamangko rimangpaengachim, Poldinni Maruti van Nongpoh-o sokaha aro cha ringna ine dongdipataha. "Angade cha ringna sikjaenga" ine Hejilade garion dongrikaiaha. Poldinde ma'gipa, pagipa aro nogipako cha ringna dokanona rimangaha. "Shillongchi sokange cha'na anaros aro singara ge'bongamang ra'-babo" ine Hejila segipako aganataha. Poldinmang cha ringe re'bae Hejilako gario nikejaha. Hejila haida latrinechi re'angakon ine chanchie uamang adita somoi sengso-aha. Indiba Hejila re'bajaha, nabajaha. Indake uamang Nongpoh-on kontasa atamang sengaha, indiba Hejila re'bajaha. Poldin gisikode saobarang Hejilako "kidnap" ka'-jokma ineba chanchiman'aha. An'tahgni 'money bag'-o Hejilani poto donggipako sambao donggipa dokandar-rangna mesoke "ia me'chikko na'simang nikrikmaia?" ine sing'aha. Bang'batan nikrikja inesan aganaiaha. Poldinni ja jrengani sokaha. Indita somoi senge dongoba Hejilani gisiko sokbajani gimin, tarake gariko Shillongona salange, ma'gipa, pagipa aro nogipako para ra'gipa noko donbae,

an'tangde direct Police Stationona re'ange FIR on'eaha. Thanani OC Rapthap, Poldin baksa apsan poraigipa ripengchim. "Mamingna jajrengna nangja, anga da'oa angni sipairangko kobor ra'ataigen" ine ka'dongate Poldinni phone nomborko see rakkiaha.

An'tangni para nokona re'bapile, ma'gipa, pagipa aro nogipamangko mi cha'dile, Hejilani giminan uamang nolpoe dongengachim. Hejilani garioni gimaana uaman da-rangan aiao inmanaha aro gisiko duk man'engaha. Poldin Turaonaba Hejilani ma'gipa pagipana phone ka'e ui'ataha. Shillongo kam ka'enggipa Hejilani mamatangni quarter-onaba re'ange nieaha Poldin. Ia mamatangni noko dongen Hejila poraiachim.

Aditani ja'man gari bolsani gam'ako knae, do'ga oe Poldin a'tilachipakko niataha. Unon ua Hejilako niksona man'aha aro Maruti van bolsa Hejilako ra'onarian tarake chalaie re'angaiaha.

: Na'a ? Indita wal baro bajio banoni re'baenga da'o ? Poldin jikgipako sing'soaha.

Hejila mamingko aganchakgija nokona napange sofao asongeaaha. Uko namen neng'bea gita dake nikaha aro ua chi ringna bi'aha. Nosarigipa re'anggalgale chi ra'bae on'aha. Glassni chiko ra'chakarian Hejila tarake ringaha aro indake aganna a'bachengaha.

: I am very sorry. Anga gualaha. Nongpoh-o anga Jyngkynsawko gronge pilakkon gualaha. Jyngkynsaw angni college-ni ripeng ong'a. Segirade saksa dal'a badinggipa "business man" ong'a. Angko nikarian Jyngkynsaw uamangni nokchi re'angna nanggen ine draaha. Anga ua-

mang baksa uamangni gario gaangpaaha. Nangna agan-
anggen ine chanchioba nang'ko sandien nikangjaha.

: Nongpoh-ni cha dokanniko mangmang na'a angko
nikjama ? Indake tol'e agannabe angnade.

: Uni giminan anga a'anenga, anga gualako dakman-
aha, angko kema ka'bo. Asolde, uamang indita adik sik-
dik dakaha, anga nang'ko name sandiangna somoi man'-
angjaha. Hejila gisikode namen jajrengaha.

: Na'a ieoniba chingna phone ka'atnade man'achim
ine Poldin ma'sina inaha.

: Phonedo ka'achim, indiba changantian 'engaged
tone' -kosa man'aiachim.

Poldinni pagiraba adita kattarangko knatime donge
indake inaha-

"Buwari, je ong'oba da'alde nang'ni kam nama ong'ja-
ha. Nang'ni college-ni ripeng gitcamko gronganana na'a
nokni darangnaba a'angija srik srik re'angna nangjachim.
Ia nang'ni dal'a gualani. Na'a da'ode nomil ong'jaha.
Segipa kime na'a da'ode me'chikmasa ong'jok."

: Mama, angko dokbo, jeba dakbo. Chong'motan
anga na'songni kema ka'aniko man'na krajajok- ine Heji-
la ka'siksike grapaha.

: Je ong'na nanga ong'jok, indiba mikkangchi inda-
ke daktainabejok. Chinga gimikan nang'ni gimin namen
jajrengbeahachim ine niotanggipaba ka'sne inaha.

Poldin gisikode Hejilani kattarangko bebera'na man'-
jaha.

: Nang'ni ripeng Jyngkynsawmang da'o an'chingni
noko maina napangajok ?- ine Poldin sing'skaaha.

: Knalan uamang Delhiona re'angengana, Da'alde somoi ong'jajok, basakoba napangaignok ine inanga. Anga ma'sia, na'a angni kattarangko bebera'na man'ja-engaha. Man'jawan, maina nang'ni biapo anga ong'oba, angaba man'jawachim. Indiba salchikkingmang ka'sapae sengkubo. Jyngkynsawman'ni re'baa ja'man uamangchi re'ange angni agangipa kattarang tol'ama bebe sing'na man'gen. Uamangni nokko anga ma'sia, Hejila aganaha.

Bebera'tonagita dake Hejilani kattarang ong'oba Poldinni na'tok cha'e gitoko bu'su bajie donggipa gitan dake chanchichipbilani gisiko dongrikalaha.

Mi cha'e ringe darangan paltangtangni tusigipaona re'angtokaha. Poldin aro Hejilaba tusina re'angaha. Hejila Poldinni ka'bako skoko gate garaha aro Poldinko girak-kotaha. Bi'a ka'chengoni da'alsa Hejilani kakket ka'saako man'nagita daknikman'aha Poldin. Hejila chong'motan da'alde antangko segipana on'kangchong'motaha.

Indiba, pringo thanani OC-ni phoneko Poldin man'soaha aro unon ua jikgipa mejalon sokbaaha ine janapat-aha. Poldin ripenggipa, thanani OC, da'al attamchipak jiktangko rime Poldinmangchin rona re'angenga ine agana-taha. Poldinni jikgipako mi bijak song'e donsochina OC bal'ekatjolaha. Poldinde beanbebe, ripenggipa jikgipako rime re'baenga ine, cha'a ringa pilakkon ready ka'e don-soaha.

Thanani OC, jikgipako rime attam dok bajio sok-baaha. Hejilaba uamangko salam ka'soaha. Mittai ra'bagipako Hejilani jako on'e "chingko namen jajrengat-jokde na'ade, da'o salsamang gimaae dongkuode hajotni mikosa cha'na nanggnokchim" ine balekjole aganaha.

Gisikode OC iana skangba Poldin jikgipako banoba, nika gita daknikman'aha aro ua indine inaha-

: Nang'ko da'alna skang banoba gronggrika gita daknikman'enga.

: Gronga dongkujade ine Hejila inaha.

"Na'ade darangko nikon indake inronga. Police kamko ka'gipa manderangde banoba banoba dingtang dingtang manderangko grongbae pilakkon nika gita daknikman'aia" ine OC jikgipa segipako inaha.

: Bochide serial ka'ronga. Bochiko haida TV serialon nikakon dada-ine Poldin nogipa OC ko inaha.

: Ge'gni tele film-osan anga acting ka'engpiti. Uarango da'oba TV-ode mesokkujaenga- ine Hejila aganchakaha.

Uni attamo mi cha'e ringe Rapthap, Jikgipako rime, Poldinni nokoni noktangchi re'angaha. Poldinde gisiko rikkit dangkit chanchie palongo tugrange dongeaha. Hejilade 'bath room'-ochim. Unon phone gam'ana Poldin 'receiver'-ko de'tome knatimaha, Poldinni ripenggipa OC-ni phone chim.

: Nang'ming mingsa urgent katta dongachim, knal pr'ingo thanaona re'bana man'genma? ine OC Poldinna phone ka'ataha.

: Phone-o aganataio ong'jawama ? ine Poldin sing'ataha.

: Ong'jawa. Gronggrikosan aganna man'gen. Re'bana man'ama man'jawa-ine OC sing'atah.

‡ Mai bajio ? ine Poldin sing'atskaha.

‡ Sku ba sku baji atamango.

: De, ong'aigen. Indiba maini gimin?

: Sokbajokon kana man'aigenba. Indiba nang'ni thanaona re'bangako nokni darangba ma'sina man'jawa. OC Poldinko rake beng'ataha.

Poldin gisiko namen dingtang dake chanchina a'bachengaha. Uko maini gimin thanaona okamatenga? Haida Hejilani gimae dongani bidingon ong'na nanga. Hejila buringni manderang (Terrorist group) baksa jak dongpamaima ineba Poldin jikgipako chanchichip-matengaha.

Poldin ong'arek ong'jarek kattarangko chanchie wal gimik mikgilan sikjaha. Pringo chakate ua thanaona re'-angaha aro OC-ba Poldinna senge dongsoengachim. Poldinni sokangako nike Rapthap, "hai ripeng saksani nokchi rona re'na" ine rimangaiaha.

Dhiman Rabha saksa Police ASI ong'a. Ua da'oba bia ka'kujaenga. Uni Quater-o Colour TV aro VCP dong-achim. Oc aro Poldinko niksoe Dhiman kuturio asongra tarisoaha. Poldinni gisiko bang'a sing'anirang nakatoba ua jrip dongaiaha. Rapthap, Dhiman Rabhako uni VCP-o BF'ko watchina aganaha. Dhiman Rapthapni nington kam ka'engachim.

: BF? Mai BF? ine Poldin sing'aha.

: BF'ko masikuja? BF'ni orto 'Blue-Film.' Na'si-mang gita dakgipa gital bia ka'daldal manderangna aro panterangna Blue-Filmangko mikisrik tarienga. Changsa-mang niama nikuja. Rapthap: Poldinko sing'aha.

: Blue film? ine Poldin jarenga gita dake ku'chi minokaha. "Nijok niade. Actor aro actress rangsa 'foreign'

manderangchim" ine Poldin aganaha.

: Da'o an'chingni nina am'enggipa BF-ni actor aro actress-de indiba an'ching Nort-east region-onisa-ine Raptap Poldinna aganaha.

: North-east-o sawa 'blue film' tarigen. Actor rangkode man'aba donga indiba actress baoniko man'gen? Poldin inaha.

: Tangka Poldin, tanzkachi jeba on?'na ama, ine ua uni ASI Rabhako VCP watchina agantaiaha.

Dhiman Rabha uni VCP-ko wataha. Uno sakgni me'asa aro saksa me'chik nidikbea bewalo palang ge'sano tusie dongengako nikna man'aha. Ka'sne ka'sne me'asa sakgnini aro me'chikni mikkangko TV screen-o (close up) rongta'e nikna man'srangaha.

: Oh, no i-ine Poldin iak samgnichi an'tang mikkangko rang'san rim'tipaha. Raptap Poldinni pakkreo jak-samsa gatate indake inaha-

: Anga uia, na'a chakchikna man'jawa. Indiba anga iako nang'na mesokna nangchongmota ine chanchiaha. Maina, na'a angni ripeng ong'a. Mini salo ge'sa "VIDEO PARLOUR"- oniko baditaba ge cassetes 'seized' ka'baachim. Uni gisepo ia da'o an'chingni nienggipa cassette-ban ge'sa ong'a. Ruuta salrangoni jotton ka'eba "Blue Film" tarigiparangko aro filmni actor-actress-rangko ui'nan man'jachira. Mejalo 'nang' nokchi re'ange nang'ni iikgipako nikesa uko banoba nika gita daknik-me'achim.

Bakki Manderangkode Raptapam katangaha. Attam-chipak na Poldinni me'ona umbas, Poldinni peramban ko

bi'e, jikgipako sing'sandion, pilak kattarangkon Hejila ku'rachakaiaha aro ua an'tangde dos gri ine aganaha. U'ie ma'siede ua indaka mitchigni kamko ka'jachim. Ma'gipa pagipani nokni obosta nam'ijade ong'jachim. Indiba ua acting ka'na mancha namnikbeachim. Uni acting ka'na skanian da'al uni janggina nam'ijani ja'ting ong'aha. College-o poraimitingo ua theatre aro dramarango namen active part ra'rongachim. Uni actingrangko nike changsao Franky Tele serial ka'na ine Hejilako mon'aha. Frankyni "Tele Art Film"-o ka'gen ine ua agreement see on'aha. Skanggipa salni shootingon ua aditade 'nervous' ong'achim. Ge'sa 'bedroom' sequence-niko ua acting ka'na nangachim. Hejila jechakbeachim. "Actingrangko demand ong'atnade basakobade indaka scene-rangkoba ka'na nanga" ine Franky aganrongachim. Smita Patil, Shabana Azmimangni dake mesokanirangko aganrongachim. Uaba dakaigen ine ku'rachake ra'achim. Acting ka'oba ua sima arini gisepon ka'achim. Shooting ka'ani antisani ja'man Franky uko an'tang para nokona rimange filmko mesokachim. Uni actor baksa ka'sagrike dakmesokani bako bang'a kragijagipa (obscene) aro rongtalgiya dakede uade ka'an ka'jachim. Gipinrangni kragiya dakmesokaniko ra'dime uni bedroom sequence baksa nangdimatesa filmko tariaha ine ua ma'siaha. Uko nike ua grapbeaha aro ua saksa manderangni nikanlo mitchiako man'a kragipa 'actress' ong'aha ine ma'sina man'aha. Indiba uanoni ua ong'katpilani ramakon nikjachim. Ka'sne ka'sne ua Frankyni 'black mailing'-ni majalo koedi ong'aha. A'bachengode jajae indiba ja'mande ua sikchongmotean ua beng'a gnanggipa (Prohibited) a'gilsakona ja'ku de'angaha. Ja'mande uko darangba mesokangna nangjachim. Pilak

dakmesekaniko ka'angna ua an'tangan gisikonin sfang-
aiachim. Uni palo ua ka'dongna angija dake tangka man'a-
chim. Ua tangkarangchin ua nogipa jonggiparangko po-
raiatachim. Ma'gipa pagipade danang' | Hejila T.V. serial
ka'e ban'e tangka man'baenga inesan kusi ong'eng-
achim. Franky gitikgitak Mumbaiehi re'angna nangani
pimin chiskugipa serialkode matchotkujaengachim. Uni
gisepon Poldin baksa uni bia ong'achim. Frankyde Mumb-
aioni pil'baesa Hejilako Poldinni bia ka'ako knaachim.
Changsao Franky Hejilako srik gronge ata ong'e dongeng-
gipa filmko matchotatani kattako aganachim. Hejila an-
tangni palo saoba gipin me'chikko 'actress' dake ra'china
aganoba Franky manijachim!

Poldin baksa bia ka'ani ja'man Hejila an'tangni janggi
tanganiko ua jakgitel ong'aha ine chanchiachim. Baditaba
jaade ua Franky baksa maming 'connection' kua rakija-
chim aro Frankyna uko grongna chotan on'jachim.

Indiba minisalo Nongpoli-o grongitike Franky uko
u'ming re'angpana draaha. Re'angpajaode pilak kattarang-
ko Franky Poldinna agantokgen ine ka'mikkenatachim aro
uni ja'mansa ua angko janggi tanga gimik jakgitel watgen
ine ku'rachakachim. Franky aro uni ripengrang ata ong'e
dongenggipa filmko matchotatna ine uko rimangdraaha,

Rapthap: Go baksa. Hejila Franky, Ganga rimani
ine mesokni ong'katangmitingon. Poldinni ja'abo rimni
"manoda na'a angko kasepa kema kaba" ine Hejila
grapbeaha. Indiba Poldin una chel'on'jaha. "Angko
kimna skang na'a jeko dakjok dakjok, indiba kima
donga ja'manba apsankon dakan' gimin na'a kema man-
na krachong'motjaha aro da'af dipet nang na'angni nok

do'gachol jringjrotna chipaha" ine Poldin aganaha.

Wal'kurara dakate Rapthapni Jeep gari re'angaha. Poldinba namen neng'beaha. Ua da'o on'tisa tusie Doctorchi re'ange HIV test ka'na gisiko tik ka'aha.

Ma'gipa, pagipa aro nogipakoba Poldin salgipinon ticket ka'e Tura Night Super-o watataha. Poldin namen gisik sukjaha. Ia uni janggi tanganio mai ong'aha ua chanchinan changpiljaengaha. Uni nokdangko name dakani jumang chu'sokjaha aro mikjapsanon gringgrang ong'angaha. Saksan song'e rite cha'na nangtaiengaha Poldin.

Antisa ja'manni katta. Poldin gisik sukjaenba office jokajoljol cinema nibae aro banoba chu ringbae nokona sokna adita waltingbaaha. Nokni a'tilaona soken, nok nokgipa Poldinko okamate "nangni songoni chatchi sokbaaha" ine aganaha. Poldin ua chatchiko nike namen aiao inmanaha. Poldin mamingkon ma'sina man'jaha. Uni janggi tanganio iarang mai ong'enga ua chachinan changpiljaha. Saobani rasong kopalo'de indita sukni, indiba Poldinni rasongode ui'na amsokgija dukni. Chatchiara uni namen ma'sigipa Dorinasachim. Dorina mikchi jingjang dake grape "na'a angko dokeba galbo, sooteba galbo, jeba dakbo rikaloba anga katjawaha, angade nangni jaken sina re'baaha" ine grape inaha. An'tangni rasong kopal ning'o maiman'cha donnue dongenga uko chanchi-sokna man'jae, rasong kopaltangkon dosie ua Dorinako mi cha'ama cha'kujaenga ine sing'aha.

Ianchim Poldinni janggini ka'dongani aro ka'saani
CHI'A, KA'A aro SIPAKA.

JAMA JANGGINA MANGONANI

Siang bon'anggimin mandeni jama janggi, katchi silchi bimang baksa bon'chapja sichapja aro bikap bak-sade sochapja ine a'gilsakni mande jat gimikan mania aro bebera'a. Jama janggiko dakgipa Ba'bra aro Rabugani a'-song chigaonan simanode mandeni janggi silchi sokangna naangna nangtelaia ine a'gilsakni mande jatrangba bebera'a. Indiba ua rongtalgipa biapona (Balpakram, Heaven, Swarga, Besest) sigimin mandeni janggi silchi maidake sokangna amgen, uni rama ba cholrangkosan jatprakan dintang dintang dake mesokani donga. Mandeni janggi silchi bimang bikapni bon'a jimani ja'man basako bachina ong'katangronga, ia chong'mot kattarangko da'ona king-king ma'sina alasokgijani chatbea aram pindape dongku-enga. Ia apalgipa a'gilsakni manderang an'tangtangni bebe-
ra'a gita, toromni gita aro jatangni dakbewal gita, si-
gimin bon'gimin mandeni jama janggiko kusi ong'atna gita
ba janggi silchiko nama tom'tomani biapona sokatna gita
jatni ong'jaoba toromtangni donsoa niam gita dakatranga.

Girin jatrangna bate A'chikrang sigimin mandeni ja-
ma janggina, katchi silchina namen simsakbata aro chan-
chibata. Sigipani jama janggiko mangona donggija, ja-
me'mang watgija sianjoljol watataiode, jamako janggiko
me'mangskarang rimea salea dongjana ine bebera'a. Mang-
onani bewalo sigimin mandeni janggi silchiko watatjaode,
ka'sani maming chinko ba kamko dakatjaode, jama jang-
gini Nokgipa, katchi silchiko ra'chaksogipa, songo nol-
napsojana, biap on sojana. Pagitchamrangni niam dakang-

gipako ba jatni Dakbewal niam riti gita sigimin mandeni jamenango mangonatos, srosname, ranga gam-a bon-pile, a'a chia chon-pile, jame-mangko watatronga mangon-atronga. Sigimin mandeni jama jangina Mangonani kamko dakatgijagipa ba jakhotgira mandena dal-batgipa gro nangani ong'a ine A'chikrang bebera'a ba chanchia.

Sigimin mandeni jama janggiko rimrik-salrike noko donangkuna man'a ineba A'chikrang bebera'a. Indake bebera'ani giminsa manggisiko so'ani kamspa grengko ding-tangmancha tarigimin a'ani me'diko chipe donronga aro uakon "Grendik gopa" ine min'a. Mangonani kam ong-kujana kingking sigira mandeni jama janggiba ua nokon dongkuenga ine bebera'a aro ripinge dona.

Kangal nokdangni mandena ia mangonani kam namen neng-nikbeani ong'a. Una areba bakdil nanggiparanga kangalrara ong'ode ba bakdil nanggiparan'ni gisepo man'e cha'kalgiparanga dakchakna gisik nangjaode galchipaode, man'e cha'gipa nokdang ong'jaode, noksande ia jame-mangpa mangonani kamko dakatna neng-nikchong'ani ong'a.

Silben, saksi, namen kangal nokdangni: bi'sa ong'a. Da'ode ua, ma'gri pagrisajok. Ma'gipade Silbenni chonmitingon staha. Ua ma'gipakon nikrikjaha. Pagipasa Silbenko chononi aldu-mittange dal'ataha. Pagipani sieni jamen Silbende sakran-dongna nangalaha. Ma'de, ma'jongni abi, ano' ada, angjongrangie. Silbenni bang'ba. Indiba uamangdehimingusan ong'ala. Darangba ukonitok sandigipaba dongja. Mipal patso mangmang on'e'cha'nan sanah. Basakoba abisana, ada, angjong chane uamangchi-

re'angoba darangba uko jonggipa ba adagipa ine ra ja aro songsul noksulni manderangnaba banoniba gilame cha'gipa mandesa ine aganrongaiachim. Silben baksa ma'ani okoni, sokchi ronggsan cha'giparangoni darang abi, ano, ada, angjongrang dongjachim. Uko darangan uamangni adagipa, jonggipa ine parakna kratcha'achim. Maina ua nam-en kangalni bi'sa, uni ma'a paba dongjaha aro una agreba Silbenara uamangni ma'detangi bi'sasa ong'a. Ma'detangni bi'sa ong'oba Silbenni jako tangka paisa dongode, man'e cha'gipa ong'ode, banonin abi, ano, ada, angjong aro ma'de, ma'jongrang bang'baigenchim. Indiba Silbenni kopal rasong namjani a'sel, ma'ani okoni saksaba abi, ano ada, angjongni mikkangko nikna man'jaha. Kangalrangni dukde mikkang janggil pilakchinin sokbaia. Ma'gipa pagipani iama janggina katchi silchina mangonani kamko dakatna ua gisikko rakate ra'aha. Je cholchiba ua kamko matchotatna kregaha.

Ua ma'gipa pagipani "GRENGDIK" ko ba'rachi kae botome songoni ong'kataha. Silben songjol nokjol gilamma a bachengaha. Uni gisiko miksonganiara, gilame ua tangka paisa chimonggen aro chu'onga gita jako tangka paisa ong'ahaode, ma'gipa pagipani jama janggina mangonani kamko dakate ua A'chikrangni bebera'ani gita dal batgipa gro nangaoni jokna skenga. Je biapo walchanga ua biapon ua tusiaiaachim. Uni gisiko miksonganiko chu'sokatna Silben namen kregaha. Cha'gija ringgijaba ua tangka paisa chimonge ma'ana paana gro nanganiko matchotatna ba mangonani kamko dakatna jotton karangaha.

Badita sai, ja aro bunsrang batangana. Wachi Kari u't-ja, aran kari u'tja, je kartoba songjol nokjol dongongija

gilamangaiaha. Songtang noktangoba Silbenni maming a'a chian dongjachim.

Salsaode ua songgipin Nokmani a'song chigaona re-ang doangman'aha. Ua a'songni ba A'kingni nokma nam-en ka'saninggipachim. Ua Nokma ia gilamgipa pantena ka'sachake indake inaha- "O, pante; na'a songjol nok'iol gilamgija angni noko tom'tom kam ka'na man'genma ? Na'a cha'na ringna mamingnaba jajrengna nangja. Nang-ni kamni kri anga dormahako on'aigen. Nangni maming aganani dongjawakonba?"

Nokmani indake ka'saninge aganani gimin Silbende gisiko namen kusi ong'aha aro "anga dongaigen Nokma" ine aganchakaha.


"De, indide knalonin kam ka'na a'bachengbo. Indiba nang'na mingsa kattakosan agane dona skenga. Angni nokni achak a'gittal mandekode bilongen chikbea. Walo a'palchi su'buna ba ki'na ong'katode saksan ong'katnabe. Nokoni saobako de'mesaesa ong'katbo," ine Nokma aganaha.

Nokmani noko chakkol nokkolrang bang'beachim. Una agreba salantian chatchi sokbarongaiachim. Uni saloha boninggipa dal'gipa sokbaani gimin Nokma wak mangsa dokaha. Ruuta salrangni ja'man nama cha'aniko man'e Silbende cha'betbongman'aha. Walon ua ok namjana dongsiksakbeaha. Cha'betbongesa ok namjaenga ine ina kene ua darangkön de'mesana pa'jaha aro kratcha'aha. Ua sriksrik'ni tusigipa nokni do'gako oe a'palchi ki'na ong'katangaha. Nokmani nokmik'rangon dal'a pokkri ge'sa dongachim. Ua pokkri rikamona re'ange unon ki'ba-aha. Ki'e man'e ua pokkri rikamoni re'bamitingon, Nok-

mani nok barandao tusie dongenggipa achak gisim uko bimingko min'e "Silben, o! Silben, na'a on'tisa chadeng-dipbo" ine okamtaitaiana ua achakni sambaona re-ange chadengeaha. Unon ua achak Silbenko indake inaha "da'ken, anga nang'pasa aganenga, achak, ong'e atchijok jinnang chotjaesa. Tangmitingo anga ia Nokmachiko gong ritcha gitam ra'sroachim. Anga sichangani giminsa groko chotbana man'jaha. Angde, na'a jegitaba groko chotangna jotton ka'angbo aro gro chotna man'jae nokkol ong'e dongaoniko angko jokatbo, groko chotangen ine kurachake na'a aneni gisikko kusi ong'atbo aro aneni skimgipa janggi silchiko tom'tomatbo", ine ua achak aganaha. Silben achakni kurangko knae namen aiao inmanaha. Pagipaan ong naba donga, ong'jaode mai-dake uni bimingko mingna man'a achak ong'eba? Jarangko chanchie Silben "anga groko chotangchong'motgen" ine ua achakna kur'mikchete a'ane ka'siksike gapaha.

Silbenni "groko chotangchong'motgen" ine kur'mikchete aganako knae ua achak namen ki'me laklake kusi ong'beaha aro nibo, ua achak unon mikoprete siangaiaha.

Waljatchichim. Nokma, chakkol, nokkol aro gipinrangba achakni mikopretako knae simake chakate Silbenko achakni sambaon chadenge dongako niktokaha. Achakde siahajok ine ma'sion, Nokmani chakkol, nokkol, aro gipinrang "na'an achakko doktataha" ine Silbenko dosiaha aro bilongen jinma chagime dokstapna a'bachengaha. Indiba ka'saninggipa aro chanchirakgipa Nokma pilakkon tom'tomatchengaha. Ua gisiko chanchiaha, ia achakara a'gital marcode namen chikbea aro bilongen sing'ba, indiba ia panteakoara maina chik-jajok, maina sing'jajok?



Nokma Silbenko okamate maimancha ong'achim kattetko aganchina gita ge'etaha. Unon Silben grapbee Nokmana indake aganaha- "nang'ni noko donggipa ia achakara angni pagipasachimna. Uni a'gilsako janggi tangmitingo nang'oniko ritche gitam tangkako ra'sroa-chimna aro ua tangkako chotangna man'jani giminsa nang'ni noko achak pil'e atchijokna".

Silbenni aganako knae Nokma namen aiao inmanaha aro rang'san ua "na'a indide Rikbenni bi'sama" ? ine sing'jolaiaha. Silbenni pagipako Rikbenan mingachim. Rikben ia Nokmani namnikbatgipa ripengchim. Ua-mang songsaninchim, apsan matchu nirikgipachim, rakkualchim. Ja'mansa chaware re'bildange uamang ding-tang dingtang songrangona chel'grikangachim.

Ripenggipa ine ma'sie Nokma ua achakna namen duk ong'aha. Ua indake inaha, "angchiko ritche gitam tangka ra'gipako anga gro rikeba dongjachim. Angni namnikbat-gipa ripeng angni noko nokkol dake kattienga ine ma'siode anga ia achakko mandeko gitan jakkalgenchim."

Salgipino Nokma noksul son'sulni manderangko ok-ame, wak, matchu doke, achakko mandeni manggisiko pujua gita pujue, ripenggipani bimingko minge, dal'a ala-niko dake, ripenggipani jama janggi, katchi silchima mang-onani kamko dakate chu'sokataha. Silbenni botome ra-bitbagipa "GRENDIK" koba uni salon gope galaha.



